


宋史

卷四百八十七之
四百九十一

内閣文庫		
番號	漢	1836
冊數	500 (423)	
函號	別 10	1



宋史卷四百八十七

列傳第二百四十六

開府儀同三司柱國錄軍國重事節書丞相監修國史領經筵事都總裁朕朕修

淺草文庫

外國三

高麗

高麗本曰高句驪禹別九州屬冀州之地周爲箕子之國漢之玄菟郡也在遼東蓋扶餘之別種以平壤城爲國邑漢魏以來常通職貢亦屢爲邊寇隋煬帝再舉兵

唐太宗親駕伐之皆不克高宗命李勣征之遂拔其城分其地爲郡縣唐末中原多事遂自立君長後唐同光天成中其主高氏累奉職貢長興中權知國事王建承高氏之位遣使朝貢以堯爲玄菟州都督充大義軍使封高麗國王晉天福中復來朝貢開運二年建死子武襲位漢乾祐末武死子昭權知國事周廣順元年遣使朝貢以昭爲特進檢校太保使持節玄菟州都督大義軍使高麗國王顯德二年又遣使來貢加開府儀同三司檢校太尉又加大師建隆三年十月昭遣其廣評侍郎李興祐副使李鵬希判官李彬等來朝貢四年春降

制曰古先哲后奄宅中區曷嘗不同文軌於萬方覃聲教於四海顧予涼德猥被鴻名爰致賔王宜優錫命開府儀同三司檢校太師玄菟州都督充大義軍使高麗國王昭曰邊鍾粹遼左推雄習箕子之餘風撫朱蒙之舊俗而能占雲候海奉贄充庭言念傾輸實深嘉尚是用賜之懿號醴以公田載推柔遠之恩式獎拱辰之志於戲來朝萬里美愛戴之有孚柔撫四封庶混并之無外永保東裔聿承天休可加食邑七千戶仍賜推誠順化保義功臣其年九月遣使時贄等來貢涉海值大風船破溺死者七十餘人贄僅免詔加勞恤開寶五年遣

使以方物來獻制加食邑賜推誠順化守節保義功臣
進奉使內議侍郎徐熙加檢校兵部尚書副使內奉卿
崔鄴加檢校司農卿並兼御史大夫判官廣評侍郎康
禮試少府少監錄事廣評員外郎劉隱加檢校尚書金
部郎中皆厚禮遣之昭卒其子佑權領國事九年佑遣
使趙遵禮奉土貢以父沒當承襲來聽朝旨授佑檢校
太保玄菟州都督大義軍使封高麗國王太宗卽位加
檢校太傅改大義軍爲大順軍遣左司禦副率于延超
司農寺丞徐昭文使其國佑遣國人金行成入就學於
國子監太平興國二年遣其子元輔以良馬方物兵器

來貢其年行成擢進士第三年又遣使貢方物兵器加
佑檢校太師以太子中允直舍人院張洎著作郎直史
館句中正爲使四年復遣供奉官閣門祇候王僕使其
國五年六月再遣使貢方物六年又遣使來貢七年佑
卒其弟治知國事遣使金全奉金銀線罽錦袍褥金銀
飾刀劔弓矢名馬香藥來貢且求襲位授治檢校太保
玄菟州都督充大順軍使封高麗國王以監察御史李
巨源禮記博士孔維奉使雍熙元年遣使韓遂齡以方
物來貢二年加治檢校太傅遣翰林侍書王著侍讀呂
文仲充使三年出師北伐以其國接契丹境常爲所侵

遣監察御史韓國華賁詔諭之曰朕誕膺丕構奄宅萬方華夏蠻貊罔不率俾蠢茲北裔侵敗王略幽薊之地中朝土疆晉漢多虞夤緣盜據今國家照臨所及書軌大同豈使齊民陷諸獷俗今已董齊師旅殄滅妖氛惟王久慕華風素懷明略效忠純之節撫禮義之邦而接彼邊疆罹於蠱毒舒泄積憤其在茲乎可申戒師徒迭相倚角協比隣國同力盪平奮其一鼓之雄戡此垂亡之寇良時不再王其圖之應俘獲生口牛羊財物器械並給賜本國將士用申賞勸先是契丹伐女真國路田高麗之界女直意高麗誘道構禍因貢馬來愬于朝且

言高麗與契丹結好倚爲勢援剽略其民不復放還洎高麗使韓遂齡入貢太宗因出女真所上告急木契以示遂齡仍令歸白本國還其所俘之民治聞之憂懼及國華至令人言於國華曰前歲冬末女真馳木契來告稱契丹興兵入其封境恐當道未知宜豫爲之備當道與女真雖爲隣國而路途遐遠彼之情僞素知之矣貪而多詐未之信也其後又遣人告曰契丹兵騎已濟梅河當道猶疑不實未暇營救俄而契丹雲集大擊女真殺獲甚衆餘族敗散逃遁而契丹壓背追捕及于富道西此德昌德成威化光化之境俘擒而去時有契丹一

授檢校水部員外郎先是治遣僧如可贊表來覲請大藏經至是賜之仍賜如可紫衣令同歸本國淳化元年三月詔加治食邑千戶遣戶部郎中柴成務兵部員外郎直史館趙化成往使其國俗信陰陽鬼神之事頗多拘忌每朝廷使至必擇良月吉辰方具禮受詔成務在館踰月乃遣書於治曰王奕葉藩輔尊獎王室凡行大慶首被徽章今國家特馳信使以申殊寵非止歷川塗之綿邈亦復蹈溟海之艱危皇朝睠遇斯亦隆矣而乃牽於禁忌泥於卜數眩惑日者之浮說稽緩天子之命嘗惟興冊之垂文非卜祝之能曉是以書稱上日不

六甲之元辰禮載仲冬但取一陽之嘉會粲然古訓足以明稽所宜改圖速拜君賜儻鳳綍無滯克彰拱極之誠則龍節有輝免貽辱命之責謹以誠告王其聽之治覽書慚懼遣人致謝為會霖雨不止仍以俟霽為請成務復遺書以責之治翌日乃出拜命二年遣使韓彥恭來貢彥恭表述治意求印佛經詔以藏經并御製祕藏銓逍遙詠蓮華心輪賜之四年正月治遣使白思柔貢方物并謝賜經及御製二月遣祕書丞直史館陳靖祕書丞劉式為使加治檢校太師仍降詔存問軍吏耆老靖等自東牟趣八角海口得思柔所乘海船及高麗木

工卽登舟自芝岡島順風泛大海再宿抵甕津口登陸行百六十里抵高麗之境曰海州又百里至閭州又四十里至白州又四十里至其國治迎使于郊盡藩臣禮延留靖等七十餘日而還遣以襲衣金帶金銀器數百兩布三萬餘端附表稱謝先是三年上親試諸道貢舉人詔賜高麗賓貢進士王彬崔罕等及第既授以官遣還本國至是靖等使回治上表謝曰學生王彬崔罕等入朝習業蒙恩並賜及第授將仕郎守祕書省校書郎仍放歸本國竊以當道荐修貢奉多歷歲年蓋以上國天高遐荒海隔不獲躬趨金闕面仰玉階惟深拱極之

誠莫展來庭之禮彬罕等幼從鮑繫差混迹於羈夷不俾蓬飄早賓王於天邑縕袍短褐玉粒桂薪堪憂食貧若爲卒歲皇帝陛下天慈照毓海量優容豐其館穀之資勗以藝文之業去歲高懸軒鑑大選魯儒彬罕接武澤宮敢萌心於中鷓盪巾英域空有志於羨魚陛下以其萬里辭家十年觀國俾登名於桂籍仍命秩於芸臺憫其懷土之心慰以倚門之望別垂宸旨令歸故鄉玄造曲成鴻恩莫報臣不勝感天戴聖之至又有張仁銓者進奉使白思柔之孔目吏也上書獻便宜思柔意其持國陰事以告仁銓懼不敢歸上命靖等領以還國仍

詔治釋仁銓罪治又上表謝曰官告國信使陳靖劉式至奉傳聖旨以當道進奉使從行孔目官張仁銓至關輒進便宜翻懷憂懼今附使臣帶歸本國者仁銓囑宅細民海門賤吏獲趨上國敢貢愚誠罔思狂瞽之光輒奏權宜之事妄塵旒冕上黷朝廷今者仰奉綸言釋其罪咎小人趨利豈虞僭越之求聖主寬恩遠降哀矜之命其張仁銓者已依詔旨放罪令掌事如故又上言願賜板本九經書用敦儒教許之先是式等復命治遣使元證衍送之證衍至安香浦口值風損船溺所賫物詔登州給證衍文據遣還仍賜治衣段二百疋銀器二百

兩羊五十口五年六月遣使元郁來乞師懇以契丹寇境朝廷以北鄙甫寧不可輕動干戈爲國生事但賜詔慰撫厚禮其使遣還自是受制于契丹朝貢中絕治卒弟誦立嘗遣兵校徐遠來候朝廷德音遠久不至咸平三年其臣吏部侍郎趙之遴命牙將朱仁紹至登州偵之州將以聞上特召見仁紹因自陳國人思慕皇化爲契丹羈制之狀乃賜誦鈿函詔一道令仁紹賫還六年誦遣使戶部郎中李宜古來朝謝恩且言晉割燕薊以屬契丹遂有路趣玄菟屢來攻伐求取不已乞王師屯境上爲之牽制詔書優答之誦卒弟詢權知國事先是

契丹既襲高麗遂築六城曰興州曰鐵州曰通州曰龍州曰龜州曰郭州于境上契丹以為貳已遣使來求六城詢不許遂舉兵奄至城下焚蕩宮室剽劫居久詢徙居昇羅州以避之兵退乃遣使請和契丹堅以六城為辭自是調兵守六城大中祥符三年大舉來伐詢與女真設奇邀擊殺契丹殆盡詢又于鴨綠江東築城與來遠城相望跨江為橋潛兵以固新城七年方遣告奏使御事工部侍郎尹誼古以金線織成龍鳳鞍并綉龍鳳鞍幘各二幅細馬二疋散馬二十疋來貢誼古還賜詢詔書七通并衣帶銀綵鞍勒馬等八年詔登州置館於

海夫以待使者其年又遣御事民官侍郎郭元來貢元自言本國城無垣墻府曰開城管六縣民不下三五千有州軍百餘置十路轉運司統之每州管縣五六小者亦三四每縣戶三四百國境南北千五百里東西二千里軍民雜處隸軍者不黥面方午為市不用錢第以布米貿易地宜稅稻風俗頗類中國無羊兔橐駝水牛驢氣候少寒暑差多有僧無道士民家器皿悉銅為之樂有二品曰庫樂曰鄉樂三歲一試舉人有進士諸科筭學每試百餘人登第者不過一二十每正月一日五月五日祭祖禰廟又正月七日家為王母像戴之二月望

僧俗燃燈如中國上元節上巳日以青艾染餅爲盤羞之冠端午有鞦韆之戲士女服尚素地產龍鬚席藤席白硯紙鼠狼尾筆元辭貌恭恪每受宴賜必自爲謝表粗有文采朝廷待之亦厚九年辭還賜詢詔書七函襲衣金帶器幣鞍馬及經史曆日聖惠方等元又請錄國朝登科記及所賜御詩以歸從之天禧元年遣御事刑官侍郎徐訥奉表獻方物于崇政殿又賀封建壽春郡王三年九月登州言高麗進奉儀禮賓卿崔元信至秦王水口遭風覆舟漂失貢物詔遣內臣撫之十一月元信等入見貢扇錦衣褥烏漆甲金飾長刀匕首扇錦鞍

馬紵布藥物等又進中布三千端求佛經一藏詔賜經還布以元信覆溺匱乏別賜衣服繒絲焉明州登州屢言高麗海船有風漂至境上者詔令存問給度海糧遣還仍爲著例五年詢遣告奏使御事禮部侍郎韓祚等一百七十九人來謝恩且言與契丹修好又表乞陰陽地理書聖惠方並賜之金行成者累官至殿中丞治表乞放還行成自以筮仕朝廷不願歸本國又以父母垂老在海外旦暮思念恨祿不及令工圖其像置正寢與妻史氏居旁室晨夕定省上食未嘗少懈淳化初通判安州被病知州李範與僚佐數人省之行成病已篤泣

宋史卷四十七 列傳 七
且言曰行成外國人爲朝官佐郡政病且死未有以報
主恩雖瞑目固有遺恨二子宗敏宗訥皆幼家素貧無
他親可依且暮委溝壑矣未幾行成死其妻養二子誓
不嫁織履以給範表其事詔以宗敏補太廟齋郎令安
州月給其家錢參緡米五斛長吏歲時存問又高麗信
州永寧人康戡字休祐父允三世爲兵部侍郎戡少好
學時紇升與契丹交兵戡從允戰木葉山下連中二矢
神色不變後陷契丹遁居墨斗嶺又至黃龍府間道得
歸高麗時允猶在開寶中允遣戡隨賓貢肄業國學太
平興國五年登進士第解褐大理評事知湘鄉縣再遷

著作佐郎知江陰軍江陰歷官以清白幹力闢陝太常
博士蘇易簡在翰林稱其吏才命爲廣南西路轉運副
使賜緋魚就遷正使再轉度支員外郎戶部判官出知
峽越二州連被詔褒其能政又爲京西轉運使加工部
郎中賜金紫戡所至好行事上章多建白以竭誠自任
景德三年卒真宗特以其子希齡爲太常寺奉禮郎給
奉終喪乾興元年二月祚等辭歸國賜詢如故事會真
宗晏駕又賫遺物以賜詢天聖八年詢復遣御事民官
侍郎元穎等二百九十三人奉表入見於長春殿貢金
器銀罽刀劍鞍勒馬香油人參細布銅器磁黃青鼠皮

等物明年二月辭歸賜予有差遣使護送至登州其後
絕不通中國者四十三年詢孫徽嗣立是爲文王熙寧
二年其國禮賓省移牒福建轉運使羅拯云本朝商人
黃真洪萬來稱運使奉密旨令招接通好奉國王旨意
形于部述當國僻居場谷邈戀天朝頃從祖禰以來素
願梯航相繼最爾平壤邇于大遼附之則爲睦鄰疎之
則爲勍敵慮邊騷之弗息蓄陸襲以靡遑久因羈縻難
圖攜貳故違述職致有積年屢卜雲祥雖美聖辰於中
國空知日遠如迷舊路於長安運屬垂鴻禮稽展慶犬
朝化覃無外度豁包荒山不謝乎織埃海不辭於支派
謹當遵尋通道遄赴豪街但茲千里之傳聞恐墜重霄
之紆眷今以公狀附真萬西還俟得報音卽備禮朝貢
徽又自言嘗夢至中華作詩紀其事三年拯以聞朝廷
議者亦謂可結之以謀契丹神宗許焉命拯諭以供擬
腆厚之意徽遂遣民官侍郎金梯等百十人來詔待之
如夏國使往時高麗人往反皆自登州七年遣其臣金
良鑑來言欲遠契丹乞改塗由明州詣闕從之郡縣供
頓無舊準頗擾民詔立式頒下費悉官給又以其不遵
華言恐規利者私與交關令所至禁止徽問遺二府甚
厚詔以付市易務售縑帛答之又表求鑿藥畫製之工

以教國人詔羅拯募願行者九年復遣崔思訓來命中
貴人做都亭西驛例治館待之寢厚其使來者亦益多
嘗獻伶官十餘輩曰夷樂無足觀止欲潤色國史爾帝
以其國尚文每賜書詔必選詞臣著撰而擇其善者元
豐元年始遣安燾左諫議大夫陳睦假起居舍人往聘
造兩艦於明州一日凌虛安濟致遠次日靈飛順濟皆
名爲神舟自定海絕洋而東既至國人歡呼出迎徽具
袍笏王帶拜受詔與燾睦尤禮館之別宮標曰順天館
言尊順中國如天云徽已病僅能拜命且乞鑿藥二年
遣王舜封挾鑿往診治徽又使柳洪來謝海中遇風失

所貢物洪上章自劾救書安慰尋獻日本所造車曰諸
侯不貢車服故不敢與土貢同前此貢物至輒下有司
稍直償以萬緡至是命勿復估以萬緡爲定數六年徽
卒在位三十八年治尚仁恕爲東夷良主然猶循其俗
王女不下嫁臣庶必歸之兄弟宗族貴臣亦然次子運
諫以爲旣通上國宜以禮革故習徽怒斥之于外訃聞
天子聞焉詔明州修浮屠供一月遣楊景略王舜封祭
奠錢勰宋球弔慰景略辟李之儀書狀帝以之儀文稱
不著宜得問學博洽器宇整秀者召赴中書試以文乃
遣又以遠服不責其備諭使者以相見之所殿名鳴吻

皆聽勿避微子順王勳嗣百日卒弟宣王運仁賢好文
內行飭備每賈客市書至則潔服焚香對之八年遣其
弟僧統來朝求問佛法并獻經像哲宗立遣使金上琦
奉慰林暨致賀請市刑法之書太平御覽開寶通禮文
苑英華詔惟賜文苑英華一書以名馬錦綺金帛報其
禮運立四年卒子懷王堯嗣未閱歲以病不能爲國國
人請其叔父鷄林公熙衛攝政未幾堯卒熙乃立凡數
歲使不至元祐四年其王子義天使僧壽介至杭州祭
亡僧言國母使持二金塔爲兩宮壽并州蘇軾奏却之
語在軾傳熙後避遼主諱改名顯顯字貪吝好奪商賈

利富室犯法輒久廢責贖雖微罪亦輸銀數斤五年復
遣使賜銀器五千兩七年遣黃宗慈來獻黃帝鍼經請
市書甚衆禮部尚書蘇軾言高麗入貢無絲髮利而有
五害今請諸書與收買金箔皆宜勿許詔許買金箔然
卒市冊府元龜以歸元符中道士賁貢徽宗立遣任懿
至報來弔賀崇寧二年詔戶部侍郎劉逵給事中吳玘
往使顯卒子侯嗣貢使接踵且令士子金瑞等五人入
太學朝廷爲置博士政和中升其使爲國信禮在夏國
上與遼人皆隸樞密院改引伴押必官爲接送館伴賜
以大晟燕樂邊豆簠簋尊壘等器至宴使者于睿謨殿

朱史卷四頁七
中宣和四年侯卒初高麗俗兄終弟及至是諸弟爭立其相李資深立侯子楷來告哀詔令事中路允迪中書舍人傅墨卿奠慰侯之在位也求醫於朝詔使二鑿往留二年而歸楷語之曰聞朝廷將用兵伐遼遼兄弟之國存之足爲邊扞女真狼虎耳不可交也業已然願二鑿歸報天子宜早爲備歸奏其言已無及矣欽宗立賀使至明州御史胡舜陟言高麗靡敝國家五十年政和以來人使歲至淮浙之間苦之彼昔臣事契丹今必事金國安知不窺我虛實以報宜止勿使來乃詔留館於明而納其贖幣明年始歸國自王徽以降雖通使不絕

然愛契丹封冊奉其正朔上朝廷及他文書蓋有稱甲子者歲貢契丹至於六而誅求不已常云高麗乃我奴耳南朝何以厚待之使至其國尤倍暴館伴及公卿小失意輒行粹筆聞我使至必假他事來覘分取賜物嘗詰其西向修貢事高麗表謝其略曰中國三甲子方得一朝大邦一周天每修六貢契丹悟乃得免高宗卽位慮金人通於高麗命迪功郎胡蠡假宗正少卿爲高麗國使以間之蠡之回史失書二年浙東路馬步軍都總管楊應誠上言由高麗至女真路甚徑請身使三韓結鷄林以圖迎二聖乃以應誠假刑部尚書充高麗國信

宋史卷四百七十一 列傳 十一
使浙東帥臣翟汝文奏言應誠欺罔爲身謀耳若高麗
辭以金人亦請問津以窺吳越其將何辭以對萬一辱
命取笑遠夷願毋遣應誠聞之遂與副使韓衍書狀官
孟健由杭州浮海以行六月抵高麗諭其王楷以所欲
爲楷曰大朝自有山東路蓋不由登州往應誠曰以貴
國路徑耳楷有難色已而命其門下侍郎傅倫至館中
果對如翟汝文言應誠曰女真不善水戰倫曰彼常於海
道往來況女真舊臣本國令及臣事之其強弱可見矣
居數月復遣其中書侍郎崔洪宰知樞密院金富軾持
前議不變謂一聖今在燕雲大朝即盡歸土未必可得

何不練兵與戰終不奉詔應誠留兩月餘不得已見楷
於壽昌門受其拜表而還十月至闕入對言狀上以楷
負國恩怒甚尚書右丞朱勝非曰彼鄰金人與中國隔
海利害甚明曩時待之過厚今安能責其報也右僕射
黃潛善曰以巨艦載精兵數萬徑擣其國彼寧不懼勝
非曰越海興師燕山之事可爲近鑒上怒解十一月楷
遣其臣尹彥頤奉表謝罪詔以二聖未歸燕設不宜用
樂乃設幕殿門外命客省官吳得興伴賜酒食念中書
舍人張澂押伴如禮遣還三年八月上謂輔臣曰聞上
皇遣內臣宮女各二人隨高麗貢使來朕聞之悲喜交

集呂頤浩曰此必金人之意不然高麗必不敢安知非
窺我虛實以報於是詔止之略曰王緬守基圖夙同文
軌乃附乘桴之信嗣修貢篚之恭惟忠順之無他質神
明而靡屈屬關聞聽良用歎嘉言念晚年實爲多故舉
中原之生聚遭強敵之震驚旣涉境以深猶稱兵而
未已茲移仗衛暫駐江湖如行使之果來恐有司之不
戒俟休邊境當問聘期壞晉館以納車庶無後悔閉漢
關而謝質非用前規想彼素懷知吾誠意紹興元年十
月高麗將入貢禮部侍郎柳約言四明殘破之餘荒蕪
單弱恐起戒心宜屯重兵以俟其至十一月詔柳約言

使高麗不與行二年閏四月楷遣其禮部員外郎崔惟
清閣門祇候沈起入貢金百兩銀千兩綾羅一百疋人
參五百斤惟清所獻亦三之一上御後殿引見賜惟清
起金帶二各以溫詔遣還是月定海縣言民亡入高麗
者約八十人願奉表還國詔候到日高麗綱首卓榮等
量與推恩十二月聞高麗遣知樞密院事洪彝敘等六
十五人來貢議以臨安府學館其使言者謂雖在兵間
不可無學恐爲所窺詔以洪惠寺爲同文館以待之旣
而卒不至六年高麗持牒官金稚圭至明州賜銀帛遣
之懼其爲金間也三十二年三月高麗綱首徐德策請

明州言本國欲遣賀使守臣韓仲通以聞殿中侍御史
吳芾奏曰高麗與金人接壤昔雅圭之來朝廷懼其爲
間亟遣還今兩國交兵德榮之請得無可疑使其果來
猶恐不測萬一不至貽笑遠方詔止之隆興二年四月
明州言高麗入貢史不書引見日恐同彝敘之詐其後
使命遂絕慶元間詔禁商人持銅錢入高麗蓋絕之也
勅高麗入使明越困於供給朝廷館遇燕賚賜予之費
以鉅萬計饋其主者不在焉我使之行每乘二神舟費
亦不貲三節官吏廉舟捐廩皆仰縣官昔蘇軾言于先
朝謂高麗入貢有五害以此也惟是國於吳會事異東

都昔高麗入使率由登萊山河之限甚遠今直趨四明
四明距行都限一浙水耳由海道奉使高麗瀰漫汪洋
洲嶼險阻遇黑風舟觸礁輒敗出急水門至羣山島始
謂平達非數十日不至也舟南北行遇順風則歷險如
夷至不數日其國東西二千里南北五百里西北接契
丹恃鴨綠江以爲固江廣三百步其東所臨海水清澈
下視十丈東南望明州水皆碧玉居開州蜀莫郡曰開
成府依大山置宮室立城壁名其山曰神嵩民居皆茅
茨大止兩椽覆以瓦者才十二以新羅爲東州樂浪府
號東京百濟爲金州金馬郡號南京平壤爲鎮州號西

京西京最盛總之凡三京四府八牧郡百有十八縣鎮
三百九十洲島三千七百郡邑之小者或只百家男女
二百十萬口兵民僧各居其一地寒多山土宜松柏有
杭黍麻麥而無秫以秬爲酒少絲蠶匹縑直銀十兩多
衣麻紵王出乘車駕牛歷山險乃騎紫衣行前捧護國
仁王經以導出令曰教曰宣臣民呼之曰聖上私謂曰
叢公后妃曰宮主百官名稱階勳功臣檢校頗與中朝
相類過御史臺則下馬違者有劾士人以族望相高柳
崔金李四姓爲貴種無宦者以世族子爲內侍六衛歲
十二月朔王坐紫門小殿注官外官則付國相有國子

監四門學學者六千人貢士三等王城曰土貢郡邑曰
鄉貢他國人口實貢間歲試于所屬再試于學所取不
過三四十人然後王親試以詩賦論三題謂之簾前重
試亦有制科宏詞之目然特文具而已士尚聲律少通
經王城有華人數百多閩人因賈舶至者密試其所能
誘以祿俸或強留之終身朝廷使至有陳牒來訴者則
取以歸百官以米爲奉皆給田納祿半給死乃拘之國
無私田民計口授業十六以上則充軍六軍三衛常留
官府三歲以選戍西北半歲而更有警則執兵任事則
服勞事已復歸農畝王亦有分地以供私用王母妃主

世子皆受湯沐田上下以賈販利入爲事日中爲虛用
米布貿易地產銅不知鑄錢中國所予錢藏之府庫時
出傳翫而已崇寧後始學鼓鑄有海東通寶重寶三韓
通寶三種錢然其俗不便也兵器疎簡無強弩大刀崇
尚釋教雖王子弟亦常一人爲僧信鬼拘陰陽病不相
視斂不撫棺貧者死則露置中野歲以建子月祭天國
東有穴號歲神常以十月望日迎祭謂之八關齋禮儀
甚盛王與妃嬪登樓大張樂宴飲賈人曳羅爲幕至百
疋相聯以示富三歲大祭祠遍其封內因是斂民財而
王與諸臣分取之祖廟在國門之外大祭則具車服冕

圭親祠王城有佛寺七十區而無道觀大觀中朝廷遣
道士往乃立福源院置羽流十餘輩俗不知鑿自王侯
來請醫後始有道其術者人首無枕骨背扁側男子巾
幘如唐裝婦人鬢髻垂右肩餘髮被下約以絳羅貫之
簪旋裙重疊以多爲勝男女自爲夫婦者不禁夏月同
川而浴婦人僧尼皆男子拜樂聲甚下無金石之音旣
賜樂乃分爲左右二部左曰唐樂中國之音也右曰鄉
樂其故習也堂上設席升必脫屣見尊者則膝行必跪
應必唯其拜無不荅子拜父猶半荅其禮性仁柔惡殺
不屠宰飲食羊豕則包以蒿而燔之刑無慘酷之科唯

惡逆及罵父母者斬餘皆杖肋外郡刑殺悉送王城歲以八月減囚死罪貧流諸島累赦抵輕重原之自明州定海遇便風三日入洋又五日抵墨山入其境自墨山過島嶼詰曲礁石間舟行甚駛七日至禮成江江居兩山間東以石峽湍激而下所謂急水門最為險惡又三日抵岸有館曰碧瀾亭使人由此登陸崎嶇山谷四十餘里乃其國都云

宋史卷四百八十七終

宋史卷四百八十八

列傳第二百四十七

魏府儀同司上柱國錄軍國事兼中書丞相監修國史領經筵事都總裁脫脫等修

外國四

交趾 大理

交趾本漢初南越之地漢武平南越分其地為儋耳珠崖南海蒼梧鬱林合浦交趾九真日南凡九郡置交趾刺史以領之後漢置交州晉宋齊梁陳因之又為交趾

郡隋平陳廢郡置州煬帝初廢州置郡唐武德中改交州總管府至德中改安南都護府梁貞明中土豪曲承美專有其地送款於末帝因授承美節鉞時劉隱擅命嶺表遣將李知順伐承美執之乃并有其地後有楊延藝紹洪皆受廣南署繼爲交趾節度使紹洪卒州將吳昌岌遂居其位昌岌死其弟昌文襲乾德初昌文死其參謀兵處珽峯州刺史矯知護武寧州刺史楊暉牙將杜景碩等爭立管內一十二州大亂部民嘯聚起爲寇盜攻交州先是楊延藝以牙將丁公著攝驪州刺史兼禦蕃都督部領卽其子也公著死部領繼之至是部領

與其子璉率兵擊敗處珽等賊黨潰散境內安堵交民德之乃推部領爲交州帥號曰大勝王署其子璉爲節度使凡三年遜璉位璉立七年閩嶺表平遂遣使貢方物上表內附制以權交州節度使丁璉以檢校太師充靜海軍節度使安南都護又詔以進奉使鄭瑋王紹祚並爲檢校左散騎常侍兼御史大夫八年遣使貢犀象香藥朝廷議崇寵部領降制曰率土來王方推以恩信舉宗奉國宜洽於封崇眷拱極之外臣舉顯親之茂典爾部領世爲右族克保遐方夙慕華風不忘內附屬九州混一五嶺廓清靡限溟濤樂輸琛寶嘉乃令子稱吾

列藩特被鴻私以旌義訓介爾眉壽服茲寵章可授開
府儀同三司檢校太師封交趾郡王太宗卽位璉又遣
使以方物來賀部領及璉旣死璉弟璿尚幼嗣立稱節
度行軍司馬權領軍府事大將黎桓擅權樹黨漸不可
制却遷璿於別第舉族禁錮之代總其衆太宗聞之怒
乃議舉兵太平興國五年秋詔以蘭州團練使孫全興
入作使張璿左監門衛將軍崔亮爲陸路兵馬部署自
邕州路入寧州刺史劉澄軍器庫副使賈湜供奉官閻
門祇候王僕爲水路兵馬部署自廣州路入是冬黎桓
遣牙校江巨湟齎方物來貢仍爲丁璿上表曰臣族本

蠻酋僻處海裔修職貢於宰旅假節制於方隅臣之父
兄代承闕寄謹保封略罔敢怠違爰暨淪亡將墜堂構
將吏耆耄乃屬於臣俾權軍旅之事用安夷落之衆土
俗獷悍懇請愈堅拒而弗從慮其生變臣已攝節度行
軍司馬權領軍府事願賜真秩令備列藩干冒宸扆伏
增震越上察其欲緩王師寢而不報王師進討破賊萬
餘衆斬首二千餘級六年春又破賊于白藤江口斬首
千餘級獲戰艦二百艘甲冑萬計轉運使侯仁寶率前
軍先進全興等頓兵花步七十日以候澄仁寶累促之
不進及澄至并軍由水路至多羅村不遇賊復擅迴花

步桓詐降以誘仁寶遂爲所害轉運使許仲宣馳奏其事遂班師上遣使就劾澄湜僕澄尋病死戮湜等邕州市全興至闕亦下吏誅餘抵罪有差仁寶贈工部侍郎七年春桓懼朝廷終行計滅復以丁璿爲名遣使貢方物上表謝罪八年桓自稱權交州三使留後遣使貢方物并以璿表來上帝賜桓詔曰丁氏傳襲三世保據一方卿旣受其倚毗爲之心替克徇邦人之請無負丁氏之心朕且欲命璿爲統帥之名卿居副貳之任剴裁制置悉繫於卿俟丁璿旣冠有所成立卿之輔翼令德彌光崇獎忠勳朕亦何吝若丁璿將材無取童心如故然

其夾世紹襲載綿星紀一旦捨去節鉞降同士伍理旣非便居亦靡安詔到卿宜遣丁璿母子及其親屬盡室來歸俟其入朝便當揆日降制授卿節旄凡茲兩途卿宜審處其一丁璿到京必加優禮今遣供奉官張宗權齎詔諭旨當悉朕懷亦賜璿詔書如旨時黎桓已專據其土不聽命是歲五月上言占城國水陸象馬數萬來寇率所部兵擊走之俘斬千計雍熙二年遣牙校張紹馮阮伯箴等貢方物繼上表求正領節鎮三年秋又遣使貢方物儋州言占城國人蒲羅遏率其族百餘衆內附言爲交州所逼故也是歲十月制曰王者懋建皇極

寵綏列藩設邸京師所以盛會同之禮胙土方面所以
表節制之雄矧茲跼焉之隅克修設羽之貢式當易帥
爰利建侯不忘請命之恭用舉疇勞之典權知交州三
使留後黎桓兼資義勇特稟忠純能得邦人之心彌謹
藩臣之禮往者丁璿方在童幼昧於撫綏桓乃肺腑之
親專掌軍旅之事號令自出威愛並行璿盡解三使之
權以徇衆人之欲遠輸誠款求領節旄士燮疆明化越
俗而咸乂尉佗恭順稟漢詔以無違宜正元戎之稱以
列通侯之貴控撫夷落對揚天休可檢校太保使持節
都督交州諸軍事安南都護充靜海軍節度交州管内
觀察處置等使封京兆郡侯食邑三千戶仍賜號推誠
順化功臣遣左補闕李若拙國子博士李覺爲使以賜
之端拱元年加桓檢校太尉進邑千戶實封五百戶遣
戶部郎中魏庠虞部員外郎直史館李度往使焉淳化
元年夏加桓特進邑千戶實封四百戶遣左正言直史
館宋鎬右正言直史館王世則又使焉明年六月歸闕
上令條列山川形勢及黎桓事迹以聞鎬等具奏曰去
歲秋末抵交州境桓遣牙內都指揮使丁承正等以船
九艘率三百人至太平軍來迎由海口入大海冒涉風
濤頗歷危險經半月至白藤徑入海汊乘潮而行凡宿

治之所皆有茅舍三間營葺尚新目爲館驛至長州漸
近本國桓張皇虛誕務爲誇訖盡出舟師戰權謂之軍
自是宵征抵海岸至交州僅十五里有茅亭五間題曰
茅徑驛至城一百里驅部民畜產妄稱官牛數不滿千
揚言十萬又廣率其民混於軍旅以雜色之衣乘船鼓
譟近城之山虛張白旗以爲陳兵之象俄而擁從桓至
展郊迎之禮桓斂馬側身問皇帝起居畢按轡偕行時
以檳榔相遺馬上食之此風俗待賓之厚意也城中無
居民止有茅竹屋數十百區以爲軍營而府署湫隘題
其門曰明德門桓質陋而目眇自言近歲與蠻寇接戰

馬傷足受詔不拜信宿之後乃張筵飲宴又出臨海
以爲娛賓之遊桓跣足持竿入水標魚每中一魚左
右皆叫譟歡躍凡有宴會預坐之人悉令解帶冠以帽
子桓多衣花纈及紅色之衣帽以真珠爲飾或自歌勸
酒莫能曉其詞嘗令數十人扛大蛇長數丈饋於使館
且曰若能食此當治之爲饌以獻焉又羈送二虎以備
縱觀皆却之不受士卒殆三千人悉黥其額曰天子寧
糧以禾穗日給令自舂爲食兵器止有弓弩木牌梭槍
竹槍弱不可用桓輕俛殘忍昵比小人腹心閹豎五七
輩錯立其側好狎飲以手令爲樂凡官屬善其事者擢

居親近左右有小過亦殺之或鞭其背一百至二百賓
佐小不如意亦捶之三十至五十黜爲閹吏怒息乃召
復其位有木塔其制樸陋桓一日請同登遊覽地無寒
氣十一月猶衣夾衣揮扇云四年進封桓交趾郡王五
年遣牙校費崇德等來修職貢然桓性本兇狠負阻山
海屢爲寇害漸失藩臣禮至道元年春廣南西路轉運
使張觀欽州如洪鎮兵馬監押衛昭美皆上言有交州
戰船百餘艘寇如洪鎮略居民劫廩實而去其夏桓所
管蘇茂州又以鄉兵五千寇邕州所管綠山都巡檢楊
文傑擊走之太宗志在撫寧荒服不欲問罪觀又言風
聞黎桓爲丁氏斥逐擁餘衆山海間失其所據故以寇
鈔自給今則桓已死觀仍上表稱賀詔太常丞陳士隆
高品武元吉奉使嶺南因偵其事士隆等復命所言與
觀同其實桓尚存而傳聞者之誤觀等不能審覈未幾
有大賈自交趾回具言桓爲帥如故詔劾觀等會觀病
卒昭美士隆元吉抵罪先是欽州如洪咄步如昔等三
鎮皆頽海交州潮陽民卜文勇等殺人併家上言至如昔
鎮鎮將黃令德等匿之桓令潮陽鎮將黃成雅移牒來
捕令德固不遣因茲海賊連年剽掠二年以工部員外
郎直史館陳堯叟爲轉運使因賜桓詔書堯叟始至遣

攝雷州海康縣尉李建中貢詔勞問桓亮叟又至知音
詰得匿文身之由盡擒其男女老少一百三十口召潮
陽鎮吏付之且戒勿加酷法咸雅得其人以狀謝亮叟
桓遂上章感恩并捕海賊二十五人送于亮叟且言已
約勒谿洞首領不得騷動七月太宗遣主客郎中直昭
文館李若拙賫詔書充國信使以美玉帶往賜桓若拙
既至桓出郊迎然其詞氣尚悻慢謂若拙曰向者劫如
洪鎮乃外境蠻賊也皇帝知此非交州兵否若使交州
果叛命則當首攻番禺次擊閩越豈止如洪鎮而已若
拙從容謂桓曰上初聞寇如洪鎮雖未知其所自然以

足下拔自交州牙校授之節制固當盡忠以報豈有他
慮及見執送海賊事果明白然而大臣僉議以爲朝廷
比建節帥以寧海表今既蠻賊爲寇害乃是交州力不
能獨制矣請發勁卒數萬會交兵以剪滅之使交廣無
後患上曰未可輕舉慮交州不測朝旨或致驚駭不若
且委黎桓討擊之亦當漸至清謐今則不復會兵也桓
愕然避席曰海賊犯邊守臣之罪也聖君容貸恩過父
母未加誅責自今謹守職約保永清於漲海因北望頓
首謝真宗卽位進封桓南平王兼侍中桓前遣都知真
馬使阮紹恭副使趙懷德以金銀七寶裝交椅一銀盆

十犀角象牙五十枚絹緇布萬匹來貢詔陳于萬歲殿
太宗神御許紹恭等拜奠及迴賜桓帶甲馬詔書慰獎
咸平四年又遣行軍司馬黎紹留使副何慶常以馴犀
一象二象狘二七寶裝金瓶一來貢其年欽州言交州
効誠場民及頭首八州使黃慶集等數百人來投有詔
慰撫遣還本道廣南西路言黎桓迎受官告使黃成雅
附奏自今國朝加恩願遣使至本道以寵海裔先是使
至交州桓卽以供奉爲辭因緣賦斂上聞之止令疆吏
召授命不復專使景德元年又遣其子攝驩州刺史明
提來貢懇求加恩使至本道慰撫還裔許之仍以明提
爲驩州刺史二年上元節賜明提錢令與占城大食使
觀燈宴飲因遣工部員外郎邵晔充國信使三年桓卒
立中子龍鉞龍鉞兄龍全劫庫財而遁其弟龍廷殺龍
鉞自立龍廷兄明護率扶闌若攻戰明提以國亂不能
還特詔廣州優加資給知廣州凌策等言桓諸子爭立
衆心離叛頭首黃慶集黃秀蠻等千餘人以不從驅率
戮及親族來投廉州請發本道二千人平之慶集等願
爲前鋒上以桓素忠順屢修職貢今幸亂而伐喪不可
就改國信使邵晔爲緣海安撫使令曉譬之慶集等仍
許口賜田糧晔乃貽書交州諭以朝廷威德如其自相

魚肉又無定位偏師問罪則黎氏盡滅矣明護懼即奉
龍廷主軍事龍廷自稱節度開明王遂欲修貢擘以聞
上曰遐荒異俗不曉事体何足恠也令削去偽官擘又
言頭首黃慶集先避亂歸化其種族尚多若復遣還慮
遭屠戮詔以慶集隸三班釐務于郴州遂許入貢四年
龍廷稱權安南靜海軍留後遣弟峯州刺史明昶副使
安南掌書記殿中丞黃成雅等來貢會舍光殿大宴上
以成雅坐遠欲稍升位著訪於宰相王旦旦曰昔子產
朝周周王饗以上卿之禮子產固辭受下卿之禮而還
國家惠綏遠方優待客使固無嫌也乃升成雅于尚書
省五品之次詔拜龍廷持進檢校太尉充靜海軍節度
觀察處置等使安南都護兼御史大夫上柱國仍封交
趾郡王食邑三千戶食實封一千戶賜推誠順化功臣
仍賜名至忠給以旌節又追贈桓中書令南越王進奉
使黎明昶等並進秩大中祥符元年天書降加翊戴功
臣食邑七百戶實封三百戶東封畢加至忠同平章事
食邑一千戶食實封四百戶二年廣南西路言蠻人劫
海口蠻尸如洪砦主李文著以輕兵襲逐中流矢死詔
督安南捕賊明年執狄獠十三人以獻至忠又遣推官
阮守疆以犀角象齒金銀紋綺等來貢并獻馴犀一上

以犀違土性不可豢畜卻不納又以逆至忠意使者既去乃令縱之海漜三年遣使來朝表求甲冑具裝詔從其請又求互市于邕州本道轉運使以聞上曰瀕海之民數患交州侵寇仍前止許廉州及如洪砦互市蓋爲邊隅控扼之所今或直趨內地事頗非便詔令本道以舊制諭之至忠纔年二十六苛虐不法國人不附大校李公蘊尤爲至忠親任嘗令以黎爲姓其年遂圖至忠逐之殺明提昶等自稱留後遣使貢奉上曰黎桓不義而得公蘊尤而効之甚可惡也然以其蠻俗不足責遂用桓故事制授特進檢校太傅充靜海軍節度觀察

處置等使安南都護兼御史大夫上柱國封交趾郡王食邑三千戶實封一千戶賜推誠順化功臣公蘊又表求太宗御書詔賜百軸四年祀汾陰后土公蘊遣節度判官梁任文觀察巡官黎再嚴以方物來貢禮成加公蘊同平章事食邑一千戶實封四百戶任文等並優進祿五年夏以進奉使李仁美爲誠州刺史陶慶文爲太常丞其從隸有道病死者所賜附還其家是冬聖祖降加公蘊開府儀同三司食邑七百戶實封三百戶賜翊戴功臣七年春又加保節守正功臣食邑一千戶實封四百戶詔交趾諸國使入貢者所在館篋供億務令豐

備其年遣知唐州刺史陶碩等來貢詔以碩爲順州刺
史充安南靜海軍行軍司馬副使吳懷副爲澄州刺史
充節度副使先是交州狄獠張婆看避罪來奔知欽州
移重嶺召之至中路復拒焉都巡檢臧嗣遂令如洪若
犒以羊酒交州偵知其事因捕狄獠故鈔如洪若掠人
畜甚衆詔轉運司督公蘊追索仍令疆吏自今不得誘
召蠻獠致生事公蘊或間歲或仍歲以方物入貢天禧
元年進封公蘊南平王加食邑一千戶實封四百戶二
年加檢校太尉食邑一千戶實封四百戶每加恩皆遣
使將命至其境上仍賜器幣襲衣金帶鞍馬焉仁宗

位加公蘊以校太師遣巨州刺史李寬泰都護副使阮
守疆來貢天聖六年遣雖州刺史李公顯來貢除統州
刺史旣而令其子弟及其壻申承貴率衆內寇詔廣南
西路轉運司發溪峒丁壯討捕之未幾卒年四十四其
子德政自稱權知留後事來告哀贈公蘊爲侍中南越
王命本路轉運使王惟正爲祭奠使又爲賜官告使除
德政檢校太尉靜海軍節度使安南都護交趾部王天
聖九年遣知峯州刺史李倓倓知愛州刺史帥日新等
來謝以倓倓爲驩州刺史日新爲珍州刺史明道元年
恭謝加同中書門下平章事景祐中郡人陳公永等六

百餘人內附德政遣兵千餘境上捕逐之詔遣還仍戒德政毋得輒誅殺尋遣靜海軍節度判官陳應機掌書記王惟慶來貢以應機爲太子中允惟慶爲大理寺丞德政加檢校太師三年其甲峒及諒州門州蘇茂州廣源州大發峒略居人馬牛焚室廬而去下詔責問之且令州及諸峒略居人馬牛焚室廬而去下詔責問之且令捕曾首正其罪以聞寶元元年進封南平王康定元年遣知峯州刺史帥用和節度副使杜猶興等來貢慶曆三年又遣節度副使杜慶安三班奉職梁材來以慶安爲順州刺史材爲太子左監門率府率六年又遣兵部

員外郎蘇仁祚東頭供奉官陶惟懼來以仁祚爲工部郎中惟懼爲內殿崇班明年又遣祕書丞杜文府左侍禁文昌來以文府爲屯田員外郎昌爲內殿崇班初德政發兵取占城朝廷疑其內畜姦謀乃訪自唐以來所通道路凡十六處令轉運使杜杞度其要害而戍守之然其後亦未嘗寇邊前後累貢馴象皇祐二年邕州誘其蘇茂州韋紹嗣紹欽等二千餘人入居省地德政表求所誘詔盡還之仍令德政約束邊戶毋相侵犯其後廣源州蠻儂智高反德政率兵二萬由水路欲入助王師朝廷優其賜而卻其兵至和二年卒其子曰尊遣人

告哀命廣南西路轉運使尚書屯田員外郎蘇安世爲
弔贈使贈德政爲侍中南越王賻賚甚厚尋除日尊特
進檢校太尉靜海軍節度使安南都護封交阯郡王嘉
祐三年貢異獸二四年寇欽州思真管五年與甲峒賊
寇邕州詔知桂州蕭固發部兵與轉運使宋咸提點刑
獄李師中同議掩擊又詔安撫使余靖等發兵捕討靖
遣諜誘占城同廣南西路兵甲趨交阯日尊惶怖上表
待罪詔未得舉兵聽日尊貢奉至京師八年遣文思使
梅景先副使大理評事李繼先貢馴象九年四月戊寅
以大行皇帝詔及遺留物賜日尊加同中書門下平章
事是日交阯使辭命內侍省押班李繼和喻以申紹泰
入寇本路屢乞討伐而朝廷以緇秦一夫肆狂又本道
已遣使謝罪故未欲興兵治平初知桂州陸誥言交州
來求儂宗旦男日新及欲取溫悶洞等地帝問交阯於
何年割據輔臣對曰自唐至德中改安南都護府梁貞
明中土豪曲承美專有此地韓琦曰向以黎桓叛命太
宗遣將討伐不服後遣使招誘始效順交州山路險僻
多瘴霧瘴毒之氣雖得其地恐不能守也神宗卽位進
封日尊南平王熙寧元年加開府儀同三司二年表言
占城國久闕貢臣親帥兵討之虜其王詔以其使郭士

安爲六宅副使陶宗元爲內殿崇班日尊自帝其國僭稱決天應運崇仁至道慶成龍祥英武睿文尊德聖神皇帝尊公蘊爲太祖神武皇帝國號大越改元寶象又改神武五年三月日尊卒命廣西轉運使康衛爲弔贈使予所奪州縣詔報之曰卿撫有南交世受王爵而乃背德奸命竊暴邊城棄祖考忠順之圖煩朝廷討伐之舉師行深入勢威始歸迹其罪尤在所絀削今遣使修貢上章致恭詳觀詞情灼見悛悔朕撫綏萬國不異邇遐但以邕欽之民遷劫炎陬久失鄉井俟盡送還省界卽以廣源等賜交州乾順初約歸三州官吏千人久之

才送民二百二十一口男子年十五以上皆刺額曰天子兵二十以上曰投南朝婦人刺左手曰官客以舟載之而泥其戶牖中設燈燭日行一二十里則止而爲作更鼓以報凡數月乃至蓋以給示海道之遠也順州落南深置戍鎮守被暹瘴霧多病沒陶弼亦終於官朝廷知其無用乃悉以四州一縣還之然廣源舊隸邕管羈縻本非交趾所有也元豐五年獻馴象二犀角象齒百六年以追捕儂智會爲辭犯歸化州又遣其臣黎文盛來廣西辨理順安歸化境界經略使熊本遣左江巡檢成卓與議文盛稱陪臣不敢爭執詔以文盛能遵乾德

恭順之意賜之袍帶及絹五百匹乃以入隘之外保樂
六縣宿桑二關予乾德首宗立如同中書門下平章事
元祐中又數上表求勿惡勿陽峒地詔不許二年遣使
入貢進封南平王徽宗時累加開府儀同三司檢校太
師大觀初貢使至京乞市書籍有司言法不許詔嘉其
慕義除禁書卜筮陰陽曆筭術數兵書敕令時務邊機
地理外餘書許買政和末又詔以交人自熙寧以來全
不生事特寬和市之禁宣和元年加乾德守司空建炎
元年詔廣西經略安撫司禁邊民毋受安南逋逃從其
主乾德之請也四年安南入貢詔卻其方物之華靡者

賜敕書厚其報以懷柔之紹興二年乾德卒贈侍中追
封南越王子陽煥嗣授靜海軍節度使特進檢校太尉
封交趾郡王賜推誠順化功臣八年陽煥卒以轉運副
使朱芾充弔祭使贈陽煥開府儀同三司追封南平王
子天祚嗣授官如其父初封之制九年詔廣西帥司毋
受趙智之入貢初乾德有側室子奔大理變姓名爲趙
智之自稱平王聞陽煥死大理遣歸與天祚爭立求入
貢欲假兵納之帝不許十七年詔文思院製鞍韉以賜
天祚二十一年累加天祚崇義懷忠保信鄉德安遠承
和功臣二十五年詔館安南使者於懷遠驛賜宴以彰

異數進封天祚南平王賜襲衣金帶鞍馬二十六年命
右司郎中汪應辰宴安南使者於玉津園八月天祚遣
李國等以金珠沉水香翠羽良馬馴象來貢詔加天祚
檢校太師增食邑隆興二年天祚遣尹子思鄧碩儼等
貢金銀象齒香物乾道六年累加天祚歸仁協恭繼美
遵度履正彰善功臣帝自卽位屢却安南貢使九年天
祚復遣尹子思李邦正求入貢帝嘉其誠許之詔館於
懷遠驛廣南西路經略安撫使范成大言本司經略諸
蠻安南在撫綏之內其陪臣豈得與中國王官亢禮或
和間貢使入境皆庭參不復報謁宜遵舊制於禮

朝廷從其請淳熙元年二月進封天祚安南國王加號
守謙功臣二年賜安南國印三年賜安南國曆日天祚
卒明年子龍翰嗣位授靜海軍節度使觀察處置等使
特進檢校太尉兼御史大夫上柱國特封安南國王加
食邑仍賜推誠順化功臣制曰卽樂國以肇封旣從世
襲極真王而錫命何待次升示殊禮也五年貢方物上
表稱謝九年詔卻安南所貢象以其無用而煩民他物
亦止受什一十六年累加龍翰守義奉國履常懷德功
臣光宗卽位奉表入貢稱賀寧宗朝賜衣帶器幣累加
謹度思忠齊美勤禮保節歸仁崇謙協恭功臣及食邑

焉嘉定五年龍翰卒詔以廣西運判陳孔碩充弔祭使
特贈侍中依前安南國王制以其子吳昌襲封其爵位
給賜如龍翰始封之制仍賜推誠順化功臣其後謝表
不至遂輟加恩吳昌卒無子以女昭聖主國事遂爲其
婿陳日嬰所有李氏有國自公蘊至吳昌凡八傳二百
二十餘年而國亡淳祐二年詔安南國王陳日嬰元賜
効忠順化保節功臣增守義二字寶祐六年詔安南情
狀叵測申飭邊備景定二年貢象一三年表乞世襲詔
日嬰授檢校太師安南國大王加食邑男威晃授
軍節度使觀察處置使檢校太尉兼御史大夫上柱國
安南國王効忠順化功臣賜金帶器幣鞍馬咸淳五年
詔安南國王父日嬰國王威晃加食邑八年明堂禮成
日嬰威晃各加食邑賜鞍馬等物
大理國卽唐南詔也熙寧九年遣使貢金裝碧玕山龜
罽刀劍犀皮甲鞍轡自後不常來亦不領於鴻臚政和
五年廣州觀察使黃璘奏南詔大理國慕義懷徠願爲
臣妾欲聽其入貢詔璘置局於賓州凡有奏請皆俟進
止六年遣進奉使天驕爽彥貴李紫琮副使坦綽李伯
祥來詔璘與廣東轉運副使徐惕偕詣闕其所經行令
監司一人主之道出荆湖南當由邵州新化縣至鼎州

而璘家潭之湘鄉轉運判官喬方欲媚璘乃排比出邵
至潭由潭至鼎一路御史劾其當農事之際而觀望勞
民詔罷方紫琮等過鼎聞學校文物之盛請於押伴求
詣學瞻拜宜聖像邵守張察許之遂往遍謁見諸生又
乞觀御書閣舉笏叩首七年二月至京師貢馬三百八
十匹及麝香牛黃細氈碧玕山諸物制以其王段和譽
爲金紫光祿大夫檢校司空雲南節度使上柱國大理
國王朝廷以爲璘功并其子暉昨昔遷官少子暉爲閣
門宣贊舍人已而知桂州周禮劾璘詐冒璘得罪自是
大理復不通於中國間一至黎州至帝紹興三年十月
廣西奏大理國求入貢及售馬詔卻之不欲以虛名勞
民也未勝非奏曰昔年大理入貢言去歲指其妄黃璘
由是獲罪帝曰遐方異域何由得實但讎當其馬價則
馬方至用益騎兵不爲無補也六年七月廣西經略安
撫司奏大理復遣使奉表貢象馬詔經略司護送行在
優禮答之九月翰林學士朱震上言乞諭廣西帥臣凡
市馬當擇謹厚者任之母遣奸功喜事之人以啓邊釁
異時南北路通則漸減廣西市馬之數庶幾消患於未
然詔從之淳熙二年十一月知靜江府張栻申嚴保伍
之禁又以邕管戍兵不能千人左右江峒丁十餘萬每

恃以為藩蔽其邕州提舉巡檢官宜精其選以撫峒丁
欲制大理當自邕管始云

此

藍

卷

無

宋史卷四百八十八終

宋史卷四百八十九

列傳第二百四十八

尉儀同三司在國錄軍國重事前中書右丞相監修國史領經筵事都總裁脫脫等

外國五

占城

真臘

蒲甘

暹黎

三佛齊

闍婆

南毗附

勃泥

注輦

丹眉流

占城國在中國之西南東至海西至雲南南至真臘國

宋史卷四百八十九

宋史卷四百八十九

列傳

一

北至驩州界汎海南去三佛齊五日程陸行至賓陀羅
國一月程其國隸占城焉東去麻逸國二日程蒲端國
七日程北至廣州使風半月程東北至兩浙一月程西
北至交州兩日程陸行半月程其地東西七百里南北
三千里南曰施備州西曰上源州北曰烏里州所統大
小州三十八不盈三萬家其國無城郭有百餘村村落
戶三五百或至七百亦有縣鎮之名土地所出箋沉香
檳榔烏楠木蘇木白藤黃蠟吉貝花布絲絞布白氍布
藤篋貝多葉篋金銀鐵錠等物五穀無麥有秬米粟豆
麻子官給種一併討租百斛果實有蓮甘蔗蕉子椰子

鳥獸多孔雀犀牛畜產多黃牛水牛而無驢亦有山牛
不任耕耨但殺以祭鬼將殺令巫祝之曰阿羅和及坊
譯云旱教他託生民獲犀象皆輸于王國人多乘象或
軟布兜或於交州市馬頗食山羊水兕之肉其風俗衣
服與大食國相類無絲蠶以白氍布纏其臂垂至於足
衣衫窄袖撮髮爲髻散垂餘髻於其後互市無緡錢止
用金銀較量錙銖或吉貝錦定博易之直樂器有胡琴
笛鼓大鼓樂部亦列舞人其王腦後鬢髻散披吉貝衣
戴金花冠七寶裝纓絡爲飾脛股皆露躡革履無襪婦
人亦腦後撮髻無笄梳其服及拜揖與男子同王每日

年坐憚官屬謁見膜拜一而止白事畢復膜拜一而退
或出遊看象采獵觀漁皆數日方還近則乘軟布兜遠
則乘象或乘一木杠四人舁之先令一人持檳榔盤前
導從者十餘輩各執弓箭刀槍手牌等其民望之膜拜
一而止日或一再出每歲稻熟王自刈一把從者及群
婦女競割之其王或以兄爲副王或以弟爲次王設高
官凡八員東西南北各二分治其事無奉祿令其所管
王俗資給之別置文吏五十餘員有郎中員外秀才之
稱分掌資儲寶貨等事亦無資奉但給龜魚充食及免
調役而已又有司幣廩者十二員王軍卒者二百餘員

皆無月奉四兵萬餘人月給秬米二斛冬夏衣布各二
匹至五匹每夕唯王升床而臥諸臣皆寢于地蓐親近
之臣見王卽胡跪作禮稍踈遠者但拱手而已其風俗
正月一日牽象周行所居之地然後驅逐出郭謂之逐
邪四月有遊船之戲定十一月十五日爲冬至人皆相
賀州縣以土產物帛獻其王每歲十二月十五日城外
縛木爲塔王及人民以衣物香藥置塔上焚之以祭天
人有疾病旋采生藥服食地不產茶亦不知醞釀之法
止飲椰子酒兼食檳榔刑禁亦設枷鎖小過以四人拽
伏於地藤杖鞭之二人左右更五捶扑量其或五六十

至一百當死者以繩繫於樹用梭槍春喉而殊其首若
故殺劫殺令象踏之或以鼻卷撲于地象皆素習將刑
人卽令養之以數諭之悉能曉焉犯姦者男女共入
牛以贖罪負國王物者以繩拘於荒唐物充而後出之
其國前代罕與中國通周顯德中其王釋利因德漫遣
其臣蒲訶散貢方物有雲龍形通犀帶菩薩石又有蓄
薇水灑衣經歲香不散猛火油得水愈熾皆貯以瑠璃
瓶建隆二年其王釋利因陀盤遣使蒲訶散來朝表章
書于貝多葉以香木函盛之貢犀角象牙龍腦香藥乳
雀四大食蕪二十使廻錫賚有量以器幣優賜其王三
年又貢象牙二十二株乳香千斤乾德四年其王悉利
因陀盤遣使因陀玠李帝婆羅貢馴象犛象象牙白氈
哥緹越諾王妻波良僕瑁男占謀律秀瓊等各貢香藥
五年又遣使李吡李破瑳相繼來貢獻開寶三年遣使
貢方物雌象 四年悉利多盤副國王李壽王妻郭氏
子蒲路鷄波羅等並遣使來貢五年其王波美稅得印
茶遣使蒲訶散來貢六年又貢七年又貢孔雀傘二西
天絳鐵四十斤九年遣使朱陀利陳陀野等來貢太平
興國二年其王波美稅陽布印茶遣使李牌來貢三年
其王及男達智遣使來貢四年遣使李木吒哆來貢六

年交州黎桓上言欲以占城俘九十三人獻于京師太宗令廣州止其存存撫之給衣服資糧遣還占城詔諭其王七年遣使乘象入貢詔留象廣州畜養之八年獻馴象能拜伏詔畜於京畿寧陵縣雍熙二年其王施利陀盤吳日歡遣婆羅門金歌麻獻方物且訴爲交州所侵詔荅令保國睦鄰三年其王劉繼宗遣使李朝仙來貢儋州上言占城人蒲羅遏爲交州所逼率其族百口來附四年秋廣州上言雷恩州關送占城夷人斯當李娘并其族一百五十人來歸分隸南海清遠縣端拱元年廣州又言占城夷人忽官等族三百一人求附淳化

元年新王楊施排自稱新坐佛逝因楊施排遣使李臻貢犀犀方物表訴爲交州所攻國中人民財寶皆爲所略上賜黎桓詔令各守境三年遣使李良甫貢方物賜其王白馬二兵器等本國僧淨戒獻龍腦金鈴銅香鑪如意等各優賜之至道元年正月其王遣使來貢奉表言前進奉使李良甫迴伏蒙聖慈賜臣細馬二疋旗五面銀裝劔五口銀纏槍五條弓弩各五張及箭等戴恩感懼稽首稽首臣生長外國賈遠天都竊承皇帝聖明威德廣大臣不憚介居海裔遣使入朝皇帝不棄蠻夷山國曲加優賜然臣自爲土長聲勢尚卑常時外國頗

相侵撓况以前民庶如芥隨風星散流離各不自保近
蒙皇帝賜臣內閑駟駿及旗幟兵器等隣國聞之知臣
所大國之寵而各懼天威不敢謀害今臣一國安寧流
民來復若非皇帝天德加護何以至此臣之一國仰望
仁聖覆之如天載之如地臣自思惟鴻恩不淺且自天
子之都至臣所居之國涉海綿邈不啻數萬里而所賜
之馬及器械等並安全而至皆聖德之所及也自前本
國進奉未嘗有旌旗弓矢之賜臣今何幸獨受異恩此
蓋天威廣被壯臣土疆臣雖殞身無以上報兼臣貢使
往復資給繒至恩重山岳不可具陳今特遣專使李波
珠副使訶散判官李磨勿等進奉犀角十株象牙三十
株玳瑁十斤龍腦二斤沉香百斤夾箋黃熟香九十斤
檀香百六十斤山得鷄二萬四千二百雙胡椒二百斤
罽席五前件物固非珍奇惟表誠懇臣生居異域幸遇
明時不貴殊珍惟重良馬儻皇帝念及外國不罪懇求
若使介南歸願垂頒賜臣之幸矣兼臣本國元有流民
三百散居南海會蒙聖旨許令放還今有猶在廣州者
本國舊有進奉夷人羅常占見駐廣州乞詔本州盡數
黠集兵籍以付常占令造船船乘便風部領歸國冀得
安其生聚以實舊疆至於萬里感恩一心事上臣之志

也上覽表遣使詣廣州詢問願還者悉付波珠使還復
賜白馬二遂爲常制咸平二年其王楊普俱毗茶逸施
高遣使朱陳堯副使蒲薩陀婆判官黎姑倫以犀象玳
瑁香藥來貢賜堯等冠帶衣褥有差景德元年又遣使
來貢詔以良馬介冑戎器等賜之四年遣使布祿爹地
加等奉表來朝表函藉以文錦詞曰占城國王楊普俱
毗茶室商頓首言臣聞二帝封疆南止屆于湘楚三王
境界北不及於幽燕仰矚昌時實邁往跡伏惟皇帝陛
下乾坤授氣日月儲英出震居尊承基御極慈悲敷於
天下聲教被於域中業茂前王功芳祖后蒼生是念黃
屋萍心無方不是生靈有土並爲臣妾具風遍布霈澤
周行凡沐照臨共增聳抃臣生于邊鄙幸襲華風蟻垤
蜂房聊爲遂性龍樓鳳閣尚阻觀光再念自假天威獲
全封部隣無侵奪俗有舒蘇每歲拜遣下臣問寧上國
蒙陛下恩霑行葦福及豚魚特因迴人頒賜戎器臣本
土惟望闕焚香歡呼拜受心知多幸曷荅洪恩聖君旣
念於賓王微懇肯忘於述職今遣專信臣布祿爹地加
副使臣除逋麻瓊珈耶判官臣皮霸抵一行人力等部
署土毛遠充歲貢雖表楚茅之禮實懷魯酒之憂虔望
睿明甫寬譴戮專信臣等迴日軍容器仗耀武之物伏

願重加賜賚蓋念忝為臣子合告君親服飾車輿威儀
斧鉞不敢私制惟望恩頒于冒冕旒不任死罪布祿參
地加言本國舊隸交州後奔于佛遊北去舊所七百里
使還賜物甚厚大中祥符三年國主施離霞離鼻麻底
遣使朱淳禮來貢四年遣使貢師子詔畜于苑中使者
留二蠻人以給參養上憐其懷土厚給資糧遣還八年
遣使波輪訶羅帝來貢訶羅帝因上言有弟陶珠項自
交州押馴象赴闕今幸得見欲携以還許之仍賜陶珠
衣幣裝錢天禧二年其王尸嘿排摩慄遣使羅皮帝加
以象牙七十二株犀角八十六株玳瑁千片乳香五百

斤丁香花八十斤荳蔻六十五斤沉香百斤箋香二百
斤別箋一劑六十八斤茴香百斤檳榔千五百斤來貢
羅皮帝加言國人詣廣州或風漂船至石塘卽累歲不
達矣三年使還詔賜尸嘿排摩慄銀四千七百兩并戎
器鞍馬海上又有蒲端國三麻蘭國勿巡國蒲婆衆國
大中祥符四年祀汾陰並遣使來貢先是咸平景德中
蒲端國主其陵數遣使來貢方物及獻紅鸚鵡其後國
主悉離羣木遐至亦以金版鐫表來上其使已絮漢上
言伏見詔旨給賜占城使鞍勒馬大神旗各二乞如恩
例有司以蒲端在占城下請賜雜絲小旗五從之天聖

八年十月占城王陽補孫施離皮蘭德加拔麻疊遣使
李蒲薩麻瑕施琶來貢木香玳瑁乳香犀角象牙慶曆
元年九月廣東商人邵保見軍賊鄂鄰百餘人在占城
轉運司選使臣二人賫詔書器幣賜占城購鄰致闕下
餘黨令就戮之明年十一月其王刑卜施離值星霞弗
遣使獻馴象三皇祐二年正月又使俱舍喇波微收羅
婆麻提楊卜貢象牙二百一犀角七十九表二通一以
本國書一以中國書五年四月其使蒲思馬應來貢方
物嘉祐元年閏三月其使蒲息施琶貢方物還至太平
州江岸崩沉失行橐明年正月詔廣州賜銀千兩六年

九月又獻馴象七年正月廣西安撫經略司言占臘素
不習兵與交趾鄰常苦侵軼而占城復近修武備以抗
交趾將繇廣東路入貢京師望撫以恩信五月其使頓
琶尼來貢方物六月賜其王施里律茶盤麻常楊溥白
馬一從其求也熙寧元年其王楊卜尸利律陀般摩提
婆遣使貢方物乞市驛馬詔賜白馬一令於廣州買騾
以歸五年貢瑠璃珊瑚酒器龍腦乳香丁香菓登茄紫
礦七年交州李乾德言其王領兵三千入并妻子來降
以正月至本道九年復遣使來言其國自海道抵真臘
一月程西北抵交州四十日皆山路所治聚落一百五

大略如州縣王年三十六歲著大食錦或川法錦大衫七條金纓珞戴七寶裝成金冠躡紅皮履出則從者五百人十婦人執金柈合貯檳榔導以樂王師討交趾以其素仇詔使乘機協力除蕩行營戰棹都監楊從先遣小校樊寔諭旨寔還言其國選兵七千扼賊要路其王以木葉書回牒詔使上之然亦不能成功後兩國同入貢占城使者乞避交人詔遇朔日朝文德殿分東西立望日則交人人垂拱殿而占城趨紫宸大宴則東西坐元祐七年又表言朝天朝討交趾願率兵掩襲朝廷以交趾數人貢不絕臣節難以興師答敕書報之而以其

便良保故倫軋丹副使傍木知突爲保順郎將政和中授其王楊卜麻疊金紫光祿大夫領廉白州刺史楊卜麻疊言身縻化外不需祿食願得薄授奉給壯觀小國許之宣和元年進檢校司空兼御史大夫懷遠軍節度琳州管內觀察處置使封占城國王自是每遇恩輒降制加封邑建炎三年楊卜麻疊遣使人貢遇郊恩制授檢校太傅加食邑紹興二十五年其子鄒時闌巴嗣立遣使進方物求封爵錫宴於懷遠驛以其父初封之爵授之報賜甚厚乾道三年子鄒亞娜嗣掠大食國方物遣人來貢以求封爵爲其國人所訴詔卻之遂不議其

宋史卷四百九十一
封七年閩人有浮海之吉陽軍者風泊其舟抵占城其國方與真臘戰皆乘大象勝負不能決闌人教其王當習騎射以勝之王大說具舟送之吉陽市得馬數十匹歸戰大捷明年復來瓊州拒之憤怒大掠而歸淳熙二年嚴馬禁不得售外蕃三年占城歸所掠生口八十三人求通商詔不許四年占城以舟師襲真臘傳其國都慶元以來真臘大舉伐占城以復讎殺戮殆盡俘其主以歸國遂亡其地悉歸真臘

真臘國亦名占臘其國在占城之南東際海西接蒲甘南抵加羅希其縣鎮風俗同占城地方七千餘里有

臺列銅塔二十有四銅象八以鎮其上象各重四千斤其國有戰象幾二十萬馬多而小政和六年十二月遣進奏使奏化郎將鳩摩僧哥副使安化郎將摩君明稽唵等十四人來貢賜以朝服僧哥言萬里遠國仰投聖化尚拘卉服未稱區區嚮慕之誠願許服所賜詔從之仍以其事付史館書諸策明年三月辭去宣和二年又遣郎將摩臘摩禿防來朝廷官封其王與占城等建炎二年以郊恩授其王金哀賓深檢校司徒加食邑遂定爲常制其屬邑有真里富在西南隅東南接波斯蘭西南與登流眉爲鄰所部有六十餘聚落慶元六年其國

主立二十年矣遣使奉表貢方物及馴象二詔優其報賜以海道遠涉後母再入貢

蒲甘國崇寧五年遣使入貢詔禮秩視注輦尚書省言注輦役屬三佛齊胡熙寧中赦書以大背紙緘以匣襍今蒲甘乃大國王不可下視附庸小國欲如大食交趾諸國禮凡制詔並書以白背金花綾紙貯以間金鍍管齋用錦絹夾襪緘封以往從之

遼黎國元祐四年般次洽移四抹栗迷等賫于闐國黑汗王并本國王表章來有司以其國未嘗入貢請視于闐條式從之

三佛齊國蓋南蠻之別種與占城爲隣居真臘閩婆之間所管十五州土產紅藤茶礦箋沉香檳榔椰子無緡錢土俗以金銀貿易諸物四時之氣多熱少寒冬無霜雪人用香油塗身其地無麥有米及青白豆鷄魚鵝鴨頗類中土有花酒椰子酒檳榔酒蜜酒皆非麴蘖所醞飲之亦醉樂有小琴小鼓毘輪奴踏曲爲樂國中文字用梵書以其王指環爲印亦有中國文字上章表卽用焉累甍爲城周數十里用椰葉覆屋人民散居城外不輸租賦有所征伐隨時調發立會長率領皆自備兵器糧糗汎海使風二十日至廣州其王號詹卑其國居人

多蒲姓唐天祐元年貢物授其使都蕃長蒲訶栗立寧
遠將軍建隆元年九月其王悉利胡大霞里檀遣使李
遮帝來朝貢二年夏又遣使蒲茂貢方物是冬其王室
利烏耶遣使茶野伽副使嘉末吒朝貢其國號生留王
李犀林男迷日來亦遣使同至貢方物三年春室利烏
耶又遣使李麗林副使李鳴末判官吒吒壁等來貢迴
賜以白犂牛尾白鼈器銀器錦線鞍轡二副開寶四年
遣使李何末以水晶火油來貢五年又來貢七年又貢
象牙乳香薔薇水萬歲棗扁桃白沙糖水水晶指環瑠璃
瓶珊瑚樹八年又遣使蒲陀漢等貢方物賜以冠帶

幣太平興國五年其二夏池遣使茶龍眉來是年潮州
言三佛齊國蕃商李用誨乘船舶載香藥犀角象牙至
海口會風勢不便飄船六十日至潮州其香藥悉送廣
州八年其王遐至遣使蒲押陀羅來貢水晶佛錦布犀
牙香藥雍熙二年船舶主金花茶以方物來獻端拱元年
遣使蒲押陀黎貢方物淳化三年冬廣州上言蒲押陀
黎前年自京迴聞本國爲閩婆所侵往南海凡一年今
春乘舶至占城偶風信不利復還乞降詔諭本國從之
咸平六年其王思離味囉無尼佛麻調華遣使李加排
副使無陀李南悲來貢且言本國建佛寺以祝聖壽願

賜名及鐘上嘉其意詔以承天萬壽爲寺額并鑄鐘以
賜授加排歸德將軍無施李南悲懷化將軍大中祥符
元年其王思離麻囉皮遣使李眉地副使蒲婆藍判官
麻河勿來貢許赴泰山陪位于朝觀壇遣賜甚厚天禧
元年其主霞遲蘇勿吒蒲迷遣使蒲謀西等奉金字表
貢真珠象牙梵夾經峴嶠奴詔許謁會靈觀游太清寺
金明池及還賜其國詔書禮物以慰獎之天聖六年八
月其王室離疊華遣使蒲押陀羅歇及副使判官亞加
盧等來貢方物舊制遠國使人貢賜以間金塗銀帶時
特以渾金帶賜之熙寧十年使大首領地華伽囉來以
爲保順慕化大將軍賜詔寵之曰吾以聲教覆露方域
不限遠邇苟知夫忠義而來者莫不錫之華爵耀以美
名以寵異其國爾悅慕皇化浮海貢琛吾用汝嘉併超
等秩以昭忠義之勸元豐中使至者再率以白金真珠
婆律薰陸香備方物廣州受表入言俟報乃護至闕下
天子念其道里遙遠每優賜遣歸二年賜錢六萬四千
緡銀一萬五百兩官其使羣陀畢羅爲寧遠將軍官陀
旁亞里爲保順郎將畢羅乞買金帶白金器物及僧紫
衣師牒皆如所請給之三年廣州南蕃綱首以其主管
國亭國王之女唐字書寄龍腦及布與提舉市舶孫迥

迥不敢受言於朝詔令估直輸之官悉市帛以報五年
遣使皮襪副使胡仙判官地華加羅來入見以金蓮花
貯真珠龍腦撒殿官皮襪爲懷遠將軍胡仙加羅爲郎
將加羅還至雍丘病死賻以絹五十匹六年又以其使
薩打華滿爲將軍副使羅悉沙文判官悉理沙文爲郎
將紹聖中再入貢紹興二十六年其王悉利麻霞囉陀
遣使入貢帝曰遠人向化嘉其誠耳非利乎方物也其
王復以珠獻宰臣秦檜時檜已死詔償其直而收之序
熙五年復遣使貢方物詔免赴闕館於泉州

開婆國在南海中其國東至海一月汎海半月至崑崙

國西至海四十五日南至海三日汎海五日至大食國
北至海四日西北汎海十五日至於勃泥國又十五日至
三佛齊國又七日至古邏國又七日至柴曆亭抵交吐
達廣州其地平坦宜種植產稻麻粟豆無麥民輸十一
之稅養海爲塩多魚鱉鷄鴨山羊兼椎牛以食果實有
木瓜椰子蕉子蔗芋出金銀犀牙箋沉檀香茴香胡椒
檳榔硫黃紅花蘇木亦務蠶織有薄絹絲絞吉貝布剪
鏤葉爲錢博易官以粟一斛二斗博金一錢室宇壯麗
飾以金碧中國賈人至者待以賓館飲食豐潔地不產
茶其酒出於椰子及蝦蟇丹樹蝦蟇丹樹華人未嘗見

或以梳櫛檳榔釀成亦甚香美不設刑禁雜犯罪者隨輕重出黃金以贖惟寇盜者殺之其王椎髻戴金鈴衣錦袍躡革履坐方牀官吏日謁三拜而退出入乘象或腰輿壯士五七百人執兵器以從國人見王皆坐俟其過乃起以王子三人爲副王官有落倍連四人共治國事如中國宰相無月奉隨時量給土產諸物次有文吏三百餘員目爲秀才掌文簿總計財貨又有卑官殆千員分主城池帑廩及軍卒其領兵者每半歲給金十兩勝兵三萬每半歲亦給金有差土俗婚聘無媒妁但納黃金於女家以娶之五月遊船十月遊山有山馬可乘跨或乘軟兜樂有橫笛鼓板亦能舞土人被髮其衣裳纏臂以下至於膝疾病不服藥但禱神求佛其俗有名而無姓方言謂真珠爲沒爹蝦羅謂牙爲家囉謂香爲峴燉盧林謂犀爲低密先是宋元嘉十二年遣使朝貢後絕淳化三年十二月其王穆羅茶遣使陀湛使副蒲亞里判官李陔那假澄等來朝貢陔湛云中國有真主本國乃脩朝貢之禮國王貢象牙真珠綉花銷金及綉絲紋雜色絲紋吉貝織雜色紋布檀香玳瑁檳榔盤犀裝劍金銀裝劍藤織花簞白鸚鵡七寶飾檀香亭子其使別貢玳瑁龍腦丁香藤織花簞先是朝貢使汎船船

宋史卷四百九 列傳 其
六十日至明州定海縣掌事船監察御史張肅先驛奏
其使飾服之狀與嘗來入貢波斯相類譯者言云今主
船大商毛旭者建溪人數往來本國因假其鄉導來朝
貢又言其國王一號曰夏至馬囉夜王妃曰落肩娑婆
利本國亦署置僚屬又其方言目船主爲勒荷王妻曰
勒荷比尼贖其船中婦人名眉珠椎髻無首飾以蠻布
纏身顏色青黑言語不能曉拜亦如男子膜拜一子項
戴金連鎖子手有金鈎以帛帶縈之名阿嚕其國與三
佛齊有讎怨互相攻戰本國山多猴不畏人呼以膏膏
之聲卽出或投以果實則其大猴二先至土人謂之

王猴夫人食畢羣猴食其餘使既至上令有司優待久
之使還賜金幣甚厚仍賜良馬戎具以從其請其使云
隣國名婆羅門有善法察人情人欲相危害者皆先知
之大觀三年六月遣使人貢詔禮之如交趾又有摩逸
國太平興國七年載寶貨至廣州海岸建炎三年以南
郊恩制授閩婆國主懷遠軍節度琳州管內觀察處置
等使金紫光祿大夫檢校司空使持節琳州諸軍事琳
州刺使兼御史大夫上柱國閩婆國王食邑二千四百
戶實封一千戶悉里地茶蘭固野可特授檢校司空加
食邑實封紹興二年復加食邑五百戶實封二百戶

南毗國在大海之西南由三佛齊風颿月餘可至其國
王每巡行先期遣兵百餘人持水灑地上以防颶風揚
沙塵列鼎百以進食日一易之置翰林官供王飲食俗
喜戰鬪習刀稍善射鑿雜白銀爲錢產眞珠番布其國
最遠番船罕到時羅巴智力干父子其種類也居泉之
城南自是船舶多至其國矣

勃泥國在西南大海中去闍婆四十五日程去三佛齊
四十日程去占城與摩逸各三十日程皆計順風爲則
其國以版爲城城中居者萬餘人所統十四州其王所
居屋覆以貝多葉民舍覆以草在王左右者爲大人王
坐繩床若出卽大布單坐其上衆昇之名曰阮囊戰鬪
者則持刀被甲甲以銅鑄狀若大筒穿之於身護其腹
背其地無麥有麻稻又有羊及鷄魚無蠶絲用吉貝花
織成布飲椰子酒昏聘之資先以椰子酒檳榔次之指
環又次之然後以吉貝布或量出金銀成其禮喪葬亦
有棺斂以竹爲輦載棄山中二月始耕則祀之凡七年
則不復祀矣以十二月七日爲歲節地熱多風雨國人
宴會鳴鼓吹笛擊鼓歌舞爲樂無器並以竹編具多葉
爲器盛食食訖棄之其國鄰於底門國有藥樹取其根
煎爲膏服之及塗其體兵刃所傷皆不死前代未嘗朝

貢故史籍不載太平興國二年其王向打遣使施弩使
副蒲亞里判官哥心等貢表貢大片龍腦一家底第二
等八家底第三等十一家底米龍腦二十家底蒼龍腦
二十家底凡一家底並二十兩龍腦版五玳瑁殼一百
檀香三椽象牙六株表云爲皇帝千萬歲壽望不責小
國微薄之禮其表以數重小囊絨封之非中國紙類木
皮而薄瑩滑色微綠長數尺濶寸餘橫卷之僅可盈握
其字細小橫讀之以華言譯之云勃泥國王向打稽首
拜皇帝萬歲萬歲萬歲願皇帝萬歲壽今遣使進貢
向打聞有朝廷無路得到昨有商人蒲盧歇船泊水口
差人逆到州言自中朝來比詣聞婆國遇猛風破其船
不得去此時聞自中國來國人皆大喜卽造船令蒲
盧歇導達入朝貢所遣使人只願平善見皇帝每年令
人入朝貢每年修貢慮風吹至占城界望皇帝詔占城
令有向打船到不要留臣本國別無異物乞皇帝勿怪
其表文如是詔館其使於禮賓院優賜以遣之元豐五
年二月其王錫理麻喏復遣使貢方物其使乞從泉州
乘海船歸國從之

注輦國東距海五里西至天竺千五百里南至羅蘭二
千五百里北至頓田三千里自古不通中國水行至廣

州約四十一萬一千四百里其國有城七重高七尺南
北十二里東西七里每城相去百步凡四城用磚二城
用土最中城以木爲之皆植花果雜木其第一至第三
皆民居環以小河第四城四侍郎居之第五城主之四
子居之第六城爲佛寺百僧居之第七城卽主之所居
室四百餘區所統有三十一部落其西十二日只都尼
施亞盧尼羅琶離鱉琶移布林琶布尼古檀布林蒲登
故里娑輪岑本蹄揭蹄閻黎池離郝部尼遮古林亞里
者林其南八日無雅加黎麻藍眉古黎苦低舍里兀密
多羅摩伽藍蒲登蒙伽林伽藍琶里琶離遊亞林池蒙
伽藍其北十二日撥羅耶無及商江林加里蒙伽藍漆
結麻藍檉折蒙伽藍皮林伽藍蒲稜和藍堡琶來田注
商盧婆羅迷蒙伽藍今國主相傳三世矣民有罪卽命
侍郎一員處治之輕者繫於木格笞五十至一百重者
卽斬或以象踐殺之其宴則國主與四侍郎膜拜于階
途共坐作樂歌舞不飲酒而食肉俗衣布亦有餅餌掌
饌執事用婦人其嫁娶先用金銀指環使媒婦至女家
後二日會男家親族約以土田生畜檳榔酒等稱其有
無爲禮女家復以金銀指環越諾布及女所服錦衣遺
婿若男欲離女則不取聘財女却男則倍償之其兵陣

用象居前小牌次之梭槍次之長刀又次之弓矢在後
四侍郎分領其衆國東南約二千五百里有悉蘭池國
或相侵伐地產真珠象牙珊瑚頗黎檳榔豆蔻吉貝布
獸有山羊黃牛禽有山鷄鸚鵡果有餘甘藤羅千年棗
椰子甘羅峴喻梅娑羅密等花有白末利散絲蛇臍佛
桑麗秋青黃碧娑羅瑤連蟬紫水蕉之類五穀有綠豆
黑豆麥稻地宜竹自昔未嘗朝貢大中祥符八年九月
其國主羅茶羅乍遣進奉使侍郎娑里三文副使蒲怒
判官翁勿防援官亞勒加等奉表來貢三文等以盤奉
真珠碧玻璃升殿布於御坐前降殿再拜譯者導其言

曰願以表遠人慕化之誠其國主表曰臣羅茶羅乍言
昨遇舸船商人到本國告稱鉅宋之有天下也二帝
開基聖人繼統登封太岳禮祀汾陰至德升聞上穹眷
命臣昌期斯遇吉語幸聞輒傾就日之誠仰露朝天之
欵臣伏聞人君之御統也無遠不臻臣子之推誠也有
道則服伏惟皇帝陛下功超邃古道建大中衣裳垂而
德合乾坤劍戟鑄而範圍區宇神武不殺人文化成廓
明明之德以臨御下民懷翼翼之心以昭事上帝至仁
不傷於行葦大信爰及於淵魚故得天鑒孔彰帝文有
赫顯今古未聞之事保家邦大定之基竊念臣微類醢

鷄賤如芻狗世居夷落地遠華風虛荷燭幽會無執誓
今者竊聽歌頌普及遐邇恨年屬於桑榆阻躬陳於王
帛矧滄溟之曠絕在跋涉以稍艱是敢傾倒赤心遙瞻
丹闕任土作貢同螻蟻之慕膾委質事君比葵藿之向
日謹遣專使等五十二人奉土物來貢凡真珠衫帽各
一真珠二萬一千一百兩象牙六十株乳香六十斤三
文等又獻珠六千六百兩香藥三千三百斤初羅茶羅
乍既聞商船言且曰十年來海無風濤古老傳云如此
則中國有聖人故遣三文等入貢三文離本國舟行七
十七晝夜歷鄒勿舟山安里西蘭山至占賓國又行六
十一晝夜歷伊麻羅里山至古羅國國有古羅山因名
焉又行七十一晝夜歷加八山占不牢山舟寶龍山至
三佛齊國又行十八晝夜度巒山水口歷天竺山至賓
頭狼山望東西王母塚距舟所將百里又行二十晝夜
度羊山九星山至廣州之琵琶洲離本國凡千一百五
十日至廣州焉詔閣門祇候史祐之館伴凡宴賜恩例
同龜茲使其年承天節三文等請於啓聖禪院會僧以
祝聖壽明年使回降詔羅茶羅乍賜物甚厚天禧四年
又遣使琵琶欄得麻烈吒奉方物入貢至廣州病死守臣
以其表聞詔廣州宴犒從者厚賜以遣之明道二年

月其王尸離囉茶印拖囉注囉遣使蒲押陀離等以泥
金表進真珠衫帽及真珠一百五兩象牙百株西梁院
副使閣門通使舍人符惟忠假鴻臚少卿押伴蒲押陀
離自言數朝貢而海風破船不達願將上等珠就龍牀
脚撒殿頂戴瞻禮以申嚮慕之心乃奉銀盤升殿跪撒
珠於御榻下而退景祐元年二月以蒲押陀離為金紫
光祿大夫懷化將軍還本國熙寧十年國王地華加羅
遣使奇囉囉副使南卑毳打判官麻圖華羅等二十七
人來獻豌豆珠麻瑠璃大洗盤白梅花腦錦花犀牙乳
香甌香薷薇水金蓮花木香阿魏鵬砂可香使副以真

珠龍腦登陛跪而散之謂之撒殿既降詔遣御藥室勞
之以為懷化將軍保順郎將各賜衣服器幣有差荅賜
其王錢八萬一千八百緡銀五萬二千兩
丹眉流國東至占臘五十程南至羅越水路十五程西
至西天三十五程北至程良六十程東北至羅斛二十
五程東南至閣婆四十五程西南至程若十五程西北
至洛華二十五程東北至廣州一百三十五程其俗以
版為屋跣足衣布無紳帶以白紵纏其首貿易以金銀
其主所居廣袤五里無城郭出則乘象車亦有小驢地
出犀象鋤石紫草蘇木諸藥四時炎熱無雪霜未嘗至

中國咸平四年... 多須機遣使打吉馬副使打臘判
富皮泥等九人來貢木香等斤輸鐵各百斤胡黃...
中五斤紫草等斤紅檀... 金花布四段蘇木萬斤...
六十一株石見... 德殿賜以冠帶服物及還又賜...
機詔書以教獎之

謝
之
經

宋史卷四百九十九

宋史卷四百九十九 列傳第二百四十九

開儀司司上柱國錄軍國重事前書丞相監修國史領經筵事都總裁脫脫等

外國六

天竺 于闐 高昌 回鶻 大食

層檀 龜茲 沙州 拂菻

天竺國舊名身毒亦曰摩伽陀復曰婆羅門俗宗淨圖
道不飲酒食肉漢武帝遣使十餘輩問出西南指求身

東熙三十五年重修

妻爲昆明所閉莫能通至漢明帝夢金人於是遣使天竺問佛道法由是其教傳於中國梁武帝後魏宣武皆來貢獻隋煬帝志通西域諸國多有至者唯天竺不通唐貞觀以後朝貢相繼則天授天中五天竺王並來朝獻乾元末河隴陷沒遂不復至周廣順三年西天竺僧薩滿多等十六族來貢名馬乾德三年滄州僧道圓自西域還得佛舍利一水晶器具葉梵經四十夾來獻道圓晉天福中詣西域在塗十二年往五印度凡六年五印度卽天竺也還經于闐與其使偕至太極召問所歷風俗山川道里一一能記四年僧行勸等一百五十七人詣闕上言願至西域求佛言許之以其所歷甘沙伊肅等州焉耆龜茲于闐割祿等國又歷布路沙加濕彌羅等國並詔諭其國令人引導之開寶後天竺僧持梵夾來獻者不絕八年冬東印度王子穰結說囉來朝貢天竺之法國王死太子襲位餘子皆出家爲僧不復居本國有曼殊室利者乃其王子也隨中國僧至焉太祖令館於相國寺善持律爲都人之所傾嚮財施盈室衆僧頗嫉之以其不解唐言卽僞爲奏求還本國許之詔既下曼殊室利始大驚恨衆僧諭以詔旨不得已遲留數月而後去自言詣南海附賈人船而歸終不知所適太

平興國七年益州僧光遠至自天竺以其王沒徙曩表
來上上令天竺僧施護譯云近聞支那國內有大明王
至聖至明威力自在每慙薄幸朝謁無由遙望支那起
居聖躬萬福光遠來蒙賜金剛吉祥無畏坐釋迦聖像
袈裟一事已披掛供養伏願支那皇帝福慧圓滿壽命
延長常爲引導一切有情生死海中渡諸沉溺今以釋
迦舍利附光遠上進又譯其國僧統表詞意亦與沒徙
曩同施護者烏墳曩國人其國屬北印度西行十二日
至乾陀羅國又西行二十日至曩誡囉賀羅國又西行
十日至嵐婆國又西行十二日至誡惹曩國又西行至

波斯國得西海自北印度行百二十日至中印度中興
度西行三程至呵囉尾國又西行十二日至未曩囉國
又西行十二日至鉢賴野迦國又西行六十日至迦囉
拏俱惹國又西行二十日至摩囉尾國又西行二十日
至烏然泥國又西行二十五日至囉囉國又西行四十
日至蘇囉茶國又西行十一日至西海自中印度行六
月程至南印度又西行九日至供迦拏國又西行一
月至海自南印度南行六月程得南海皆施護之所述
云八年僧法遇自天竺取經回至三佛齊遇天竺僧彌
摩羅失黎語不多令附表願至中國譯經上優詔召之

法遇後募緣製龍寶蓋袈裟將復往天竺表乞給所經
諸國勅書遂賜三佛齊國王遐至葛古羅國主司馬信
芒柯蘭國主讚怛羅西天王子謨馱仙書以遺之雍熙
中衛州僧辭滄自西域還與胡僧密坦羅奉北印度王
及金剛坐 那爛陀書來又有婆羅門僧永世與波斯
外道阿里烟同至京師永世自云本國名利得國王姓
牙羅五得名阿喏你縛衣黃衣戴金冠以七寶爲飾出
乘象或有輿以音樂螺鈸前導多遊佛寺博施貧乏其
妃曰摩訶你衣大紬縷金紅衣歲一出多所振施人有
冤抑候王及妃出遊御迎隨伸訴署國相四人庶務

委裁制五穀六畜果實與中國無異市易用銅錢有文
漫圓徑如中國之制但實其中心不穿貫耳其國東行
經六月至大食國又二月至西州又三月至夏州阿里
烟自云本國王號黑衣姓張名哩沒用錦綵爲衣每遊
獵二二日一還國署大臣九人治國事無錢貨以雜物
貿易其國東行經六月至婆羅門至道二年八月有天
竺僧隨舶至海岸持帝鐘鈴杵銅鈴各一佛像一軀貝
葉梵書一夾與之語不能曉天聖二年九月西印度僧
愛賢智信護等來獻梵經各賜紫方袍束帛五年二月
僧法吉祥等五人以梵書來獻賜紫方袍景祐三年正

月僧善齋等九人貢梵經佛骨及銅牙菩薩像賜以束帛

于闐國自漢至唐皆入貢中國安史之亂絕不復至晉天福中其王李聖天自稱唐之宗屬遣使來貢高祖命供奉官張鄴持節冊聖天爲大寶于闐國王建隆二年十二月聖天遣使貢圭一以玉爲柙玉枕一本國摩尼師貢琉璃瓶二胡錦一段其使言本國去京師九千九百里西南抵葱嶺與婆羅門接相去三千餘里東接吐蕃西北至疏勒二千餘里國城東有白玉河西有綠玉河次西有烏玉河源出崑崙山去國城西三百里每

歲秋國人取玉於河謂之撈至土宜蒲萄人多醜以爲酒甚美俗事妖神乾德三年五月于闐僧善名善法來朝賜紫衣其國宰相因善名等來致書樞密使李崇矩求通中國太祖令崇矩以書及器幣報之至是冬沙門道圓自西域還經于闐與其朝貢使至四年又遣其子德從來貢方物開寶二年遣使直末山來貢且言本國有玉一塊凡二百三十七斤願以上進乞遣使取之善名復至貢阿魏子賜號昭化大師因令還取玉又國王男總嘗貢玉櫛刀亦厚賜報之四年其國僧吉祥以其國王書來上自言破疏勒國得舞象一欲以爲貢詔許

之大中祥符二年其國黑韓王遣回鶻羅廝溫等以方物來貢廝溫跪奏曰臣萬里來朝獲見天日願聖人萬歲與遠人作主上詢以在路幾時去此幾里對曰涉道一年晝行暮息不知里數昔時道路嘗有剽掠今自瓜沙抵于闐道路清謐行旅如流願遣使安撫遠俗上曰路遠命使益以勞費爾國今降詔書汝即齋往亦與命使無異也初太平興國中有澶州卒王貴者晝忽見使者至營急召貴偕行南至河橋驛馬已具即命乘之俄覺騰虛而去頃之駐馬但見屋室宏麗使者引貴入見其主者容衛制度悉如王者謂貴曰侯汝等五十八當

往于闐國北通聖山取一異寶以奉皇帝宜深志之遂復乘馬凌虛而旋軍中失貴已數日矣驗所乘即營卒之馬也知州朱煦劾貴以聞太宗釋之天禧初貴自陳年已五十八願遵前戒西至于闐尋許其行貴至秦州以道遠悔懼俄於市中遇一道士引貴出城登高原問貴所欲具以實對即命貴閉目少頃令開視山川頓異道士曰此于闐國北境通聖山也復引貴觀一池池中

有仙童出一物授之謂曰持此奉皇帝又令瞑目俄頃復至秦州向之道士已失所在發其物乃玉印也文曰國王趙萬永寶州以獻天聖三年十二月遣使羅面于

多副使金三監使安多都監趙多來朝貢王鞍轡白玉帶胡錦獨峯橐駝乳香珊瑚詔給還其直館于都亭西驛別賜襲衣金帶銀器百兩衣著二百羅面于多金帶嘉祐八年八月遣使羅撒溫獻方物十一月以其國王為特進歸忠保順砮鱗黑鞞王羅撒溫言其王乞賜此號也于闐謂金翅鳥為砮鱗黑鞞蓋可汗之訛也羅撒溫等以獻物賜直少不受及請所獻獨峯橐駝詔以遠人特別賜錢五千貫以橐駝還之而與其已賜之直其後數以方物來獻熙寧以來遠不踰一二歲近則歲再至所貢珠玉珊瑚翡翠象牙乳香木香琥珀花蕊布珊瑚

砂龍鹽西錦王鞞馬盟牘麟金星石木銀安息鷄香有所持無表章每賜以暈錦旋欄衣金帶器幣宰相則盤球雲錦夾欄地產乳香來輒羣貨私與商賈牟利不售則歸諸外府得善價故其來益多元豐初始詔惟齎表及方物馬驢乃聽以詣闕乳香無用不許貢四年遣部領阿辛上表稱于闐國僂儻有福力量知文法黑汗王書與東方日出處大世界田地主漢家阿舅大官家大略云路遠傾心相向前三遣使人貢未回重複數百言董禮使導至熙州譯其辭以聞詔前三輩使入皆已朝見錫賚遣發賜勅書諭之神宗嘗問其使去國歲

月所經何國及有無鈔略對曰去國四年道塗居其半
歷黃頭回紇青唐惟懼契丹鈔略耳因使之圖上諸國
距漢境遠近爲書以授李憲八年九月遣使人貢使者
爲神宗飯僧追福賜錢百萬還其所貢師子元祐中以
其使至無時令熙河間歲一聽至闕八年請討夏國不
許紹聖中其王阿忽都董娥密竭篤又言緬藥家作過
別無報效已遣兵攻甘沙肅三州詔厚答其意知秦州
游師雄言于闐大食拂菻等國貢奉般次踵至有司憚
於供養抑留邊方限二歲一進外夷慕義萬里而至此
非所以本速人也從之自是訖于宣和朝享不絕

高昌國漢車師前王之地有高昌城取其地勢高敞人
民昌盛以爲名焉後魏初沮渠無諱自署高昌太守無
諱死茹茹以闕伯周爲高昌王高昌有王始於此後魏
至隋皆來貢獻唐貞觀中侯君集平其國以其地爲西
州安史之亂其地陷沒乃復爲國語訛亦云高敞然其
地頗有回鶻故亦謂之回鶻建隆三年四月西州回鶻
阿都督等四十二人以方物來貢乾德三年十一月西
州回鶻可汗遣僧法淵獻佛牙琉璃器琥珀盞太平興
國六年其王始稱西州外生師于王阿厮蕭漢遣都督
麥索溫來獻五月太宗遣供奉官王延德殿前承旨白

勛使高昌八年其使安鵬盧來貢雍熙元年四月主延
德等還敘其水程來獻云初自夏州歷玉亭鎮次歷黃
羊平其地平而產黃羊渡沙磧無水行人皆載水凡二
日至都囉囉族漢使過者遺以財貨謂之打當次歷茅
女嘴子族族臨黃河以羊皮爲囊吹氣實之浮於水或
以橐駝牽木棧而渡次歷茅女王子開道族行入六窠
沙沙深三尺馬不能行行者皆乘橐駝不育五穀沙中
生草名登相收之以食次歷樓子山無居人行沙磧中
以日爲占旦則言日暮則向日日中則止夕行望月亦
知之次歷臥梁勃特族地有都督山唐回鶻之地次歷
大蟲太子族族接契丹界人衣尚錦繡器用金銀馬乳
釀酒飲之亦醉次歷屋地因族蓋達于于越王子之子
次至達于于越王子族次歷拽利王子族有合羅川唐
回鶻公主所居之地城基尚在有湯泉池次歷回墩族
經馬驢山望鄉嶺嶺上石龕有李陵題字處次歷格囉
美源西方百川所會極望無際鷗鷺鳧鴈之類甚衆次
至花邊城亦名李僕射城城中首領號通天王次歷小
石州次歷伊州州將陳氏其先自唐開元二年領州凡
數十世唐時詔勅尚在地有野蠶生苦參上可爲綿帛
有羊尾大而不能走尾重者三斤小者一斤肉如熊白

而甚美又有礪石剖之得賓鐵謂之喫鐵石又生胡桐
樹經雨即生胡桐律次歷益都次歷納職城城在大患
鬼魁磧之東南望王門關甚近地無水草載糧以行凡
三日至鬼谷口避風驛用本國法設祭出詔神禦風展
乃息凡八日至澤田寺高昌聞使至遣人來迎次歷地
名寶莊又歷六種乃至高昌高昌即西州也其地南距
于闐西南距大食波斯西距西天步路涉雪山葱嶺皆
數千里地無雨雪而極熱每盛暑居人皆穿地爲穴以
處飛鳥羣萃河濱或起飛即爲日氣所燦墜而傷翼屋
室覆以白氈雨及五寸即廬舍多壞有水源出金嶺

之周圍國城以溉田園作本磧地產五穀惟無生向麥貴
人食馬餘食羊及鳧鴈樂多琵琶篳篥出貂鼠曰氍繡
文花葢布俗好騎射婦人戴油帽謂之蘇幕遮用開元
七年曆以三月九日爲寒食餘二社冬至亦然以銀或
鑰石爲筒貯水激以射或以水交潑爲戲謂之壓陽氣
去病好游賞行者必抱樂器佛寺五十餘區皆唐朝所
賜額寺中有大藏經唐韻玉篇經音等居民春月多羣
聚遊樂於其間游者馬上持弓矢射諸物謂之禳災有
勅書樓藏唐太宗明皇御札詔勅緘鎖甚謹復有摩尼
寺波斯僧各持其法佛經所謂外道者也所統有南葵

厥北突厥大衆尉小衆尉樣磨割祿黠戛司末蠻格哆
族預龍族之名甚衆國中無貧民絕食者共賑之人多
壽考率百餘歲絕無夭死時四月師子王避暑於北廷
以其舅阿多于越守國先遣人致意於延德曰我王舅
也使者拜我乎延德曰持朝命而來禮不當拜復問曰
見王拜乎延德曰禮亦不當拜阿多于越復數日始相
見然其禮頗恭師子王邀延德至其北廷歷交河州凡
六日至金嶺口寶貨所出又兩日至漢家砦又五日上
金嶺過嶺即多雨雪嶺上有龍堂刻石記云小雪山也
嶺上有積雪行人皆服毛罽度嶺一日至此廷想高臺

寺其王烹羊馬以其膳九豐潔地多馬玉及王后太子
各養馬放牧平川中彌亘百餘里以毛色分別爲羣莫
知其數北廷川長廣數千里鷹鷂鵬鶻之所生多美草
不生花砂鼠大如鸞鷲禽捕食之其王遣人來言擇日
以見使者願無訝其淹久至七日見其王及王子侍者
皆東向拜受賜旁有持磬者擊以節拜王聞磬聲乃拜
既而王之兒女親屬皆出羅拜以受賜遂張樂飲宴爲
優戲至暮明日汎舟於池中池四面作鼓樂又明日游
佛寺曰應運大寧之寺貞觀十四年造北廷北山中出
碣砂山中嘗有烟氣涌起無雲霧至夕光燄若炬火照

見禽鼠皆赤采者著木底糞取之皮者卽焦下有穴生
青泥出穴外卽變爲砂石土人取以治皮城中多樓臺
卉木人自督端正性工巧善冶金銀銅鐵爲器及攻王
善馬直絹一匹其駑馬充食纜直一丈貧者皆食肉西
抵安西卽唐之西境七月令延德先還其國其王九月
始至亦聞有契丹使來謂其王云高敞本漢土漢使來
覘視封域將有異圖王當察之延德偵知其語因謂王
曰契丹素不順中國今乃反間我欲殺之王固勸乃止
自六年五月離京師七年四月至高昌所歷以詔賜諸
國君長襲衣金帶繒帛八年春與其謝恩使凡百餘人

復循舊路而還雍熙元年四月至京師景德元年又遣
使金延福來貢

回鶻本匈奴之別裔在天德西北安陵水上後魏號鐵
勒唐初號特勒後稱回紇其君長曰可汗自貞觀以後
朝貢不絕至德初出兵助國討平安史之亂故累朝恩
禮最重然而恃功橫恣朝廷雖患其邀求無厭然頗姑
息聽從之元和中訛爲回鶻會昌中其國衰亂其相馭
職者擁外甥將龐勒西奔安西旣而回鶻爲幽州張仲
武所破龐勒乃自稱可汗居甘沙西州無復昔時之盛
矣歷梁後唐晉漢周皆遣使朝貢後唐同光中冊其國

王仁美爲英義可汗仁美卒其弟仁裕立冊爲順化可汗晉天福中又改爲奉化可汗仁裕卒子景瓊立先是唐朝繼以公主下嫁故回鶻世稱中朝爲舅中朝每賜荅詔亦曰外甥五代之後皆因之建隆二年景瓊遣使朝獻三年阿都督等四十二人以方物來貢乾德二年遣使貢玉百團琥珀四十斤犛牛尾貂鼠等三年遣使趙黨誓等四十七人以團玉琥珀紅白犛牛尾爲貢開寶中累遣使貢方物其宰相鞠仙越亦貢馬太平興國二年冬遣殿直張璨齎詔諭甘沙州回鶻可汗外甥賜以器幣招致名馬美以備車騎琮璜之用五年甘沙

州回鶻可汗夜落紇密禮邊遣使裴溢約等四人以橐駝名馬珊瑚琥珀來獻雍熙元年四月西州回鶻與婆羅門僧永世波斯外道阿里烟同入貢四年合羅川回鶻第四族首領遣使朝貢端拱二年九月回鶻都督石仁政麼囉王子邈孛王子越黠黃水州巡檢四族並遣賀蘭山下無所統屬諸部入貢多由其地麼囉王子自云向爲靈州馮暉阻絕由是不通貢奉今有內附意各以錦袍銀帶賜之咸平四年可汗王祿勝遣使曹萬通以玉勒名馬獨峯橐駝賓鐵劍甲琉璃器奉貢萬通自言任本國樞密使本國東至黃河西至雪山有小

郡數百甲馬甚精習願朝廷命使統領使得縛繼遷以
獻因降詔祿勝曰賊遷凶特人神所棄卿世濟忠烈義
篤勇甥繼上奏封備陳方略且欲大舉精甲就覆殘賊
拓土西陲獻等北闕可汗功業其可勝言嘉歎所深不
忘朕意今更不遣使臣一切委卿統制特授萬通左神
武軍大將軍優賜祿勝器服景德元年夜落紇遣使來
貢四年又遣尼法仙等來朝獻馬仍許法仙遊五臺山
又遣僧翟入奏來獻馬欲於京城建佛寺祝聖壽求賜
名額不許大中祥符元年夏州萬子等軍主領族兵趨
回鶻回鶻設伏要路示弱不與鬪俟其過奮起擊之勦

戮殆盡其生擒者回鶻驅坐於野悉以所獲資糧示之
曰爾輩狐鼠覓求小利我則不然遂盡焚而殺之唯萬
子軍主挺身走鎮戎軍以聞上曰回鶻嘗殺繼遷世爲
讎敵甘州使至亦言德明侵軼之狀意頗輕視之量其
兵勢德明未易敵也其年夜落紇寶物公主及沒孤公
主娑溫宰相各遣使來貢東封禮成以可汗王進奉使
姚進爲寧遠將軍寶物公主進奉曹進爲安化郎將賜
以袍笏又賜夜落紇介冑二年又遣左溫宰相何居錄
越樞密使翟符守榮等來貢是年龜茲國王可汗遣使
李廷福副使安福監使翟進來進香藥花蓋布名馬獨

峯驪大尾羊玉鞍勒琥珀瑜石等四年翟符守榮等三十人請從祀汾陰其年夜落紇遣使貢方物秦州回鶻安密獻玉帶於道左禮成以翟符守榮為左神武軍大將軍安密民為保順郎將餘皆賜冠帶器幣其年夜落紇遣使言敗趙德明立功首領請加恩賞詔給司戈司階郎將告勅十道使得承制補署六年龜茲進奉使李延慶等三十六人對于長春殿獻名馬弓箭鞍勒團玉香藥等優詔答之先是甘州數與夏州接戰夜落紇貢奉多為夏州鈔奪及宗哥熱感悅朝廷恩化乃遣人援送其使故頻年得至宗師既而喃廝羅欲娶可汗女而

無聘財可汗不許因為讎敵五年秦州遣指揮使楊知進譯者郭敏送進奉使至甘州會宗哥怨隙阻歸路遂留知進等不敢遣八年敏方得還可汗王夜落隔上表言寶物公主疾死以西涼人蘇守信劫亂不時奏聞又謝恩賜寶鈿銀匣曆日及安撫詔書仍乞慰諭宗哥使開朝貢之路九年楊知進亦至遂遣郭敏賜宗哥詔書并甘州可汗器幣其年使來朝貢言夜落隔卒九年宰相諸部落奉夜落隔歸化為可汗王領國事天禧二年夜落隔歸化遣都督安信等來朝四年又遣使同龜茲國可汗王智海使來獻大尾羊初回鶻西奔族種散處故

宋史卷四百六十一 雜錄 五
甘州有可汗王西州有克韓王新復州有黑韓王皆其
後焉天聖元年五月甘州夜落隔通順遣使阿葛之王
文貴來貢方物六月詔甘州回紇外甥可汗王夜落隔
通順特封歸忠保順可汗王二年五月遣使都督習信
等十四人來貢馬及黃湖綿細白氈三年四月可汗王
公主及宰相撒溫訛進馬乳香賜銀器金帶衣著暈錦
旋襪有差五年八月遣使安萬東等一十四人來貢方
物六年二月遣人貢方物熙寧元年入貢求買金字大
般若經以墨本賜之六年復來補其首領五人爲軍主
歲給綵二十疋神宗問其國種落正齒幾何曰三十餘

萬壯可用者幾何曰二十萬明年勅李憲擇使聘阿
骨使諭回鶻令發兵深入夏境憲以命殿直皇甫旦旦
往不得前而妄奏功狀詔遠旦赴御史獄抵罪然回鶻
使不常來宣和中間因入貢散而之陝西諸州公爲買
易至留久不歸朝廷慮其習知邊事且往來皆經夏國
於播傳非便乃立法禁之

大食國本波斯之別種隋大業中波斯有桀黠者探穴
得文石以爲瑞乃糾合其衆剽略資貨聚徒浸盛遂自
立爲王據有波斯國之西境唐永徽以後屢來朝貢其
王盆泥未換之前謂之白衣大食阿蒲羅拔之後謂之

宋史卷四十四 列傳 三十一
黑衣大食乾德四年僧行勤遊西域因賜其王書以招
懷之開寶元年遣使來朝貢四年又貢方物以其使李
訶末爲懷化將軍特以金花五色綾紙寫官告以賜是
年本國及占城門婆又致禮物于李煜煜不敢受遣使
來上因詔自今勿以爲獻六年遣使來貢方物七年國
王訶黎佛又遣使不囉海九年又遣使蒲希密皆以方
物來貢太平興國二年遣使蒲思那副使摩訶末判官
蒲囉等貢方物其從者曰深體黑謂之崐崙奴詔賜其
使襲衣器幣從者縑帛有差四年復有朝貢使至雍熙
元年國人花茶來獻花錦越諾揀香白龍腦白沙糖薺

薇水琉璃器淳化四年又遣其副會長李亞勿來貢其
國舶王蒲希密至南海以老病不能詣闕乃以方物附
亞勿來獻其表曰大食舶主臣蒲希密上言衆星垂象
回拱於北辰百谷疏源委輸於東海屬有道之柔遠罄
無外以宅心伏惟皇帝陛下德合二儀明齊七政仁宥
萬國光被四夷賡歌洽擊壤之民重譯走奉珎之貢臣
顧惟殊俗景慕中區早傾向日之心頗鬱朝天之願昨
在本國會得廣州蕃長寄書招諭令入京貢奉盛稱皇
帝聖德布寬大之澤詔下廣南寵綏蕃商阜通遠物臣
遂乘海舶爰率土毛涉歷龍王之宮瞻望天帝之境庶

遵玄化以慰宿心今則雖屈五羊之城猶賒雙鳳之闕
自念衰老病不能興遐想金門心日俱斷今遇李亞勿
來貢謹備蕃錦藥物附以上獻臣希密凡進象牙五十
株乳香千八百斤賓鐵七百斤紅絲吉貝一段五色雜
花蕃錦四段白越諾二段都爹一琉璃瓶無名異一塊
蕃薇水百瓶詔賜希密勅書錦袍銀器束帛等以答之
至道元年其國舶主蒲押施黎齋蒲希密表來獻白龍
腦一百兩膾膾臍五十對龍鹽一銀合眼藥二十小琉
璃瓶白沙糖三琉璃甕十年棗脯上五味子各六琉璃
瓶船上福桃一琉璃瓶薑微水二十琉璃瓶乳香山子

一坐香錦二段馳毛褥而二段白越諾三段引對於崇
政殿譯者代奏云父蒲希密因緣射利泛舶至廣州迨
今五稔未歸母令臣遠來尋訪昉至廣州見之具言前
歲蒙皇帝聖恩降勅書賜以法錦袍紫綾纏頭間塗金
銀鳳瓶一對綬絹二十疋今臣奉章來謝以方物致
貢太宗因問其國對云與土秦國相鄰爲其統屬今本
國所管之民纔及數千有都城介山海間又問其山澤
所出對云惟犀象香藥問犀象以何法可取對云象用
象媒誘至漸以大繩羈縻之耳犀則使人升大樹操弓
矢伺其至射而殺之其小者不用弓矢可以捕獲上賜

以襲衣冠帶被褥等物令闕門宴犒訖就館延留數月
遣回降詔答賜蒲希密黃金準其所貢之直三年二月
又與賓同隴國使來朝咸平二年又遣判官文成至三
年船主陀婆離遣使穆吉臯來貢吉臯還賜陀婆離詔
書并器服鞍馬六年又遣使婆羅欽三摩尼等來貢方
物摩尼等對於崇政殿持真珠以進自云離國日誠願
得瞻威顏卽獻此乞不給回賜真宗不欲違其意俟其
還優加恩賚景德元年又遣使來時與三佛齊蒲端國
使並在京師會上元觀燈皆賜錢縱其宴飲其秋蕃客
蒲加心至四年又遣使同吉臯使來優加館餼之禮許

徧至苑囿寺觀遊覽大中祥符元年十月車駕東封船
主陀婆離上言願執方物赴泰山從之又船主李亞勿
遣使麻勿來獻玉圭並優賜器幣袍帶并賜國主銀筋
繩床水罐器械旗幟鞍勒馬等四年祀汾陰又遣歸德將
軍陀羅離進甌香象牙琥珀無名異繡絲紅絲碧黃綿
細越諾紅馳毛間金線壁衣碧白琉璃酒器薔薇水千
年棗等詔令陪位禮成並賜冠帶服物五年廣州言大
食國人無西忽盧華百三十歲耳有重輪貌甚偉異自
言遠慕皇化附古邏國船船而來詔就賜錦袍銀帶加
束帛天禧三年遣使蒲麻勿陀婆離副使蒲加心等來

貢先是其入貢路繇沙州步復國抵秦州乾興初趙德明請道其國中不許至天聖元年來貢恐爲西人鈔略乃詔自今取海路繇廣州至京師至和嘉祐間四貢方物最後以其首領蒲沙乙爲武寧司借熙寧中其使辛押陀羅乞統察蕃長司公事詔廣州赦度又進錢銀助脩廣州城不許六年都蕃首保順郎將蒲陀婆離慈表令男麻勿奉貢物乞以自代而求爲將軍詔但授麻勿郎將其國部屬各異名故有勿巡有陀婆離有俞盧和地有麻囉跋等國然皆冠以大食勿巡所貢又有龍腦兜羅錦錦襪蕃花簞陀婆有金飾壽帶連環臂鈎數

珠之屬政和中橫州士曹蔡蒙休押伴其使人都沿道故滯留疆市其香藥不償直事聞詔提點刑獄置獄推治因詔自今蕃夷入貢並選承務郎以上清幹官押伴按程而行無故不得過一日乞取賈市者論以自盜云其國在泉州西北舟行四十餘日至藍里次年乘風颿又六十餘日始達其國地雄壯廣袤民俗侈麗甲於諸蕃天氣多寒其王錦衣玉帶躡金履朔望冠百寶純金冠其居以碼碯爲柱綠甘爲壁水晶爲瓦碌石爲磚活石爲灰帷幕用百花錦官有丞相太尉各領兵馬二萬餘人馬高七尺士卒驍勇民居屋宇略與中國同市肆

多金銀鍍錦工匠技術咸精其能建炎三年遣使奉寶
至珠貝入貢帝謂侍臣曰大觀宣和間茶馬之政廢故
武備不脩致金人亂華危亡不絕如綫今復捐數十萬
緡以易無用之珠玉曷若惜財以養戰士詔張浚却之
優賜以荅遠人之意紹興元年復遣使貢文犀象齒朝
廷亦厚加賜與而不貪其利故遠人懷之而貢賦不絕
層檀國在南海傍城距海二十里熙寧四年始入貢海
道便風行百六十日經勿巡古林三佛齊國乃至廣州
其王名亞美羅亞眉蘭傳國五百年十世矣人語音如
大食地春冬暖貴人以越布纏頭服花錦白氎布出入
乘象馬有奉祿其法輕罪杖重罪死穀有稻粟麥食有
魚畜有綿羊山羊沙牛水牛橐駝馬犀象藥有木香血
竭沒藥鵬砂阿魏薰陸寔真珠玻璃密沙華三酒交易
用錢官自鑄三分其齊金銅相半而銀居一分禁民私
鑄元豐六年使保順郎將層伽尼再至神宗念其絕遠
詔頒賚如故事仍加賜白金二千兩

龜茲本回鶻別種其國主自稱師子王衣黃衣寶冠與
宰相九人同治國事國城有市井而無錢貨以花蓋布
博易有米麥瓜果西至大食國行六十日東至夏州九
十日或稱西州回鶻或稱西州龜茲又稱龜茲回鶻自

天聖至景祐四年入貢者五最後賜以佛經一藏熙寧
四年使李延慶曹福入貢五年又使盧大明篤都入貢
紹聖三年使大首領阿連撒羅等三人以表章及玉佛
至洮西熙河經略使以其罕通使請令於熙秦州博買
而估所齎物價答賜遣還從之

沙州本漢燉煌故地唐天寶末陷于西戎大中五年張
義潮以州歸順詔建沙州爲歸義軍以義潮爲節度使
領河沙甘肅伊西等州觀察營田處置使義潮入朝以
從子惟深領州事至朱梁時張氏之後絕州人推長史
曹義金爲帥義金卒子元忠嗣周顯德二年來貢授本

軍節度檢校太尉同中書門下平章事鑄印賜之建隆
三年加兼中書令子延恭爲瓜州防禦使興國五年元
忠卒子延祿遣人來貢贈元忠燉煌郡王授延祿本軍
節度弟延晟爲瓜州刺史延瑞爲衙內都虞候咸平四
年封延祿爲譙郡王五年延祿延瑞爲從子宗壽所害
宗壽權知留後而以其弟宗允權知瓜州表求旌節乃
授宗壽節度使宗允檢校尚書左僕射知瓜州宗壽子
賢順爲衙內都指揮使大中祥符末宗壽卒授賢順本
軍節度弟延惠爲檢校刑部尚書知瓜州賢順表乞金
字藏經洎茶藥金箔詔賜之至天聖初遣使來謝貢乳

宋史卷四百九
香礪砂玉團自景祐至皇祐中凡七貢方物

拂菻國東南至滅力沙北至海皆四十程西至海三十程東自西大食及于闐回紇青唐乃抵中國歷代未嘗朝貢元豐四年十月其王滅力伊靈改撒始遣大首領你厮都令厮孟判來獻鞍馬刀劍真珠言其國地甚寒土屋無瓦產金銀珠西錦牛羊馬獨峯馳梨杏千年棗巴欖粟麥以蒲萄釀酒樂有箜篌壺琴小篳篥偏鼓王服紅黃衣以金線織絲布纏頭歲三月則詣佛寺坐紅床使人昇之貴臣如王之服或青綠緋白粉紅褐紫並纏頭跨馬城市田野皆有首領庄之每歲惟夏秋兩得

奉給金錢錦穀帛以治事大小為差刑罰罪輕者杖數十重者至二百大罪則盛以毛囊投諸海不尚鬪戰鄰國小有爭但以文字來往相詰問事大亦出兵鑄金銀為錢無穿孔面鑿彌勒佛背為王名禁民私造元祐六年其使兩至詔別賜其王帛二百匹白金瓶襲衣金束帶

宋史卷四百九終

宋史卷四百九十一

列傳第二百五十一

開禧傳三司在國錄軍國重事前書右丞相監修國史領經筵事都總裁脫脫等修

外國七

流末國 定安國 渤海國 日本國 党項

流末國在泉州之東有海島曰澎湖烟火相望其國塹
柵三重環以流水植棘為藩以刀稍弓矢劍鼓為兵器
跡月盈虧以紀時無他奇貨商賈不通厥土沃壤無賦

欽有事則均稅旁有毗舍邪國語言不通袒裸肝膽殆
非人類淳熙聞國之酋豪嘗率數百輩將至泉之水溇
圍頭等村肆行殺掠喜鐵器及匙筋人閉戶則免但利
其門圈而去擲以匙筋則頰捨之見鐵騎則爭剗其甲
駢首就戮而不知悔臨敵用標鎗繫繩十餘丈爲操縱
蓋惜其鐵不忍棄也不駕舟楫惟縛竹爲筏急則羣昇
之泗水而遁

定安國本馬韓之種爲契丹所攻破其酋帥糾合餘衆
保于西鄙建國改元自稱定安國開寶三年其國王烈
萬華因女真遣使入貢乃附表貢獻方物太平興國中

太宗方經營遠略討擊契丹因降詔其國令張倚角之
勢其國亦怨寇讎侵侮不已聞中國用兵北討欲依玉
師以摠宿憤得詔大喜六年冬會女真遣使來貢路由
本國乃托其使附表來上云定安國王臣烏玄明言伏
遇聖主洽天地之恩撫夷貊之俗臣玄明誠喜誠抃頓
首頓首臣本以高麗舊壤渤海遺黎保據方隅涉歷星
紀仰覆露鴻鈞之德被浸漬無外之澤各得其所以遂
本性而頃歲契丹恃其強暴入寇境土攻破城若俘略
人民臣祖考守節不降與衆避地僅存生聚以迄于今
而又扶餘府昨背契丹並歸本國災禍將至無大於此

所宜受天朝之密畫率勝兵而助討必欲報敵不敢違
命臣玄明誠懇誠願頓首頓首其末題云元興六年十
月日定安國王臣玄明表上聖皇帝前上荅以詔書曰
勅定安國王烏玄明女真使至得所上表以朕尊賜手
詔諭旨且陳感激卿遠國豪帥名王茂緒奄有馬韓之
地介于鯨海之表疆敵吞併失其故土沉寃未報積憤
奚伸矧彼獯戎尚搖蔓毒出師以薄伐乘夫天災之流
行敗衄相尋滅亡可待今國家已于邊郡廣屯重兵只
俟嚴冬卽申天討卿若能追念累世之耻宿戒舉國之
師當予伐罪之秋展爾復仇之志朔漠底定爵賞有加

宜思永圖無失良便而況渤海願歸於朝化扶餘已肯
於賊庭勵乃宿心糾其協力克期同舉必集大勳尚阻
重溟未遑遣使倚注之切鑒寐寧忘以詔付女真使令
齋以賜之端拱二年其王子因女真使附獻馬雕羽鳴
鏑淳化二年其王子太元女真使上表其後不復至
渤海本高麗之別種唐高宗平高麗徙其人居中國則
天萬歲通天中契丹攻陷營府高麗別種大祚榮走保
遼東睿宗以爲急汗州都督封渤海郡王因自稱渤海
國併有扶餘肅慎等十餘國歷唐梁後唐朝貢不絕後
唐天成初爲契丹阿保機攻扶餘城下之改扶餘爲東

丹府命其子突欲留兵鎮之阿保機死渤海王復攻扶餘不能克歷長興清泰遣使朝貢周顯德初其酋豪崔烏斯等三十人來歸其後隔絕不能通中國太平興國四年太宗平晉陽移兵幽州其酋帥大鸞河率小校李勛等十六人部族三百騎來降以鸞河爲渤海都指揮使六年賜烏舍城浮渝府渤海瑛府王詔曰朕纂紹丕構奄有四海普天之下罔不率俾矧太原封域國之保障頃因竊據遂相承襲倚遼爲援歷世逋誅朕前歲親提銳旅盡護諸將拔并門之孤壘斷匈奴之右臂嘗言弔伐以蘇黔黎茲北戎非理構怨輒肆葶食犯我封

略一昨出師逆擊斬獲甚衆今欲鼓行深入席捲長驅焚其龍庭大殲醜類素聞爾國密邇寇讎迫於吞并力不能制因而服屬困於率割當靈旗破敵之際是鄰邦雪憤之日所宜盡出族帳佐予兵鋒俟其翦滅沛然封賞幽薊土宇復歸中原朔漠之外悉以相與勗乃協力朕不食言時將大舉征契丹故降是詔諭旨九年春宴大明殿因召大鸞河慰撫久之上謂殿前都校劉延翰曰鸞河渤海豪帥束身歸我嘉其忠順夫夷落之俗以馳騁爲樂候高秋戒候當與駿馬數十匹令出郊遊獵以遂其性因以緡錢十萬并酒賜之

日本國者本倭奴國也自以其國近日所出故以日本
爲名或云惡其舊名改之也其地東西南北各數千里
西南至海東北隅隔以大山山外卽毛人國自後漢始
朝貢歷魏晉宋隋皆來貢唐永徽顯慶長安開元天寶
上元貞元元和開成中並遣使入朝雍熙元年日本國
僧裔然與其徒五六人浮海而至獻銅器十餘事并本
國職員今王年代紀各一卷裔然衣綠自云姓藤原氏
父爲真連真連其國五品品官也裔然善隸書而不通
華言問其風土但書以對云國中有五經書及佛經白
居易集七十卷並得自中國土宜五穀而少麥交易用

銅錢文曰乾文大_字畜有水牛驢羊多犀象產絲蠶多
織絹薄緻可愛樂有國中高麗二部四時寒暑大類中
國國之東境接海島夷人所居身面皆有毛東奧州產
黃金西別島出白銀以爲貢賦國王以王爲姓傳襲至
今王六十四世文武僚吏皆世官其年代紀所記云初
主號天御中主次日天村雲尊其後皆以尊爲號次天
八重雲尊次天彌聞尊次天忍勝尊次瞻波尊次萬魂
尊次利利魂尊次國狹槌尊次角龔魂尊次汲津丹尊
次面垂見尊次國常立尊次天鑑尊次天萬尊次沫名
杵尊次伊奘諾尊次素戔嗚尊次天照大神尊次正哉

吾勝速日天押穗耳尊次天彥尊次炎尊次彥瀲尊凡
二十三世並都於筑紫日向宮彥瀲第四子號神武天
皇自筑紫宮入居大和州橿原宮卽位元年甲寅當周
僖王時也次綏靖天皇次安寧天皇次懿德天皇次孝
昭天皇次孝天皇次孝靈天皇次孝元天皇次開化天
皇次崇神天皇次垂仁天皇次景行天皇次成務天皇
次仲哀天皇國人言今爲鎮國香椎大神次神功天皇
開化天皇之曾孫女又謂之息長足姬天皇國人言今
爲太奈良姬大神次應神天皇甲辰歲始於百濟得中
國文字今號八蕃菩薩有大臣號紀武內年三百七歲

次仁德天皇次履中天皇次反正天皇次允恭天皇次
安康天皇次雄略天皇次清寧天皇次顯宗天皇次仁
賢天皇次武烈天皇次繼體天皇次安開天皇次宣化
天皇次天國排開廣庭天皇亦名欽明天皇卽位十一
年壬申歲始傳佛法於百濟國當此土梁承聖元年次
敏達天皇次用明天皇有子曰聖德太子年三歲聞十
人語同時解之七歲悟佛法于菩提寺講聖鬘經天雨
曼陀羅華當此土隋開皇中遣使泛海至中國求法華
經次崇峻天皇次推古天皇欽明天皇之女也次舒明
天皇次皇極天皇次孝德天皇白雉四年律師道照求

法至中國從三藏僧玄奘受經律論當此土唐永徽四年也次天豐財重日足姬天皇令僧智通等入唐求大乘法相教當顯慶三年次天智天皇次天武天皇次持總天皇次文武天皇大寶三年當長安元年遣粟田真人入唐求書籍律師道慈求經次阿閉天皇次飯依天皇次聖武天皇寶龜二年遣僧正玄昉入朝當開元四年次孝明天皇聖武天皇之女也天平勝寶四年當天寶中遣使及僧入唐求內外經教及傳戒次天炊天皇次高野姬天皇聖武天皇之女也次白壁天皇二十四年遣二僧靈仙行賀入唐禮五臺山學佛法次桓武天

皇遣騰元葛野與空海大師及延歷寺僧澄入唐詣天台山傳智者止觀義當元和元年也次諾樂天皇次嗟哦天皇次淳和天皇次仁明天皇當開成會昌中遣僧入唐禮五臺次文德天皇當大中年間次清和天皇次陽成天皇次光孝天皇遣僧宗睿入唐傳教當光啓元年也次仁和天皇當此土梁龍德中遣僧寬建等入朝次醍醐天皇次天慶天皇次封上天皇當此土周廣順年也次冷泉天皇今爲太上天皇次守平天皇卽今王也凡六十四世畿內有山城大和河內和泉攝津凡五州共統五十三郡東海道有伊賀伊勢志摩尾張參河

遠江駿河伊豆甲斐相模武藏安房上總常陸凡十四州共統一百一十六郡東山道有通江美濃飛驒信濃上野下野陸奥出羽凡八州共統一百二十二郡北六道有狹越前加賀能登越中越後佐渡凡七州共統三十郡山陰道有丹波丹後徂馬因幡伯耆出雲石見隱伎凡八州共統五十二郡山陽道有播磨美作備前備中備後安藝周防長門凡八州共統六十九郡南海道有伊紀淡路河波讚耆伊豫土佐凡六州共統四十八郡西海道有筑前筑後豐前豐後肥前肥後日向大隅薩摩凡九州共統九十三郡又有壹伎對馬多祇凡

三島各統二郡是謂五畿七道三島凡三千七百七十二都四百一十四驛八十八萬三千三百二十九課丁課丁之外不可詳見皆奮然所記云按隋開皇二十年倭王姓阿每名自多利思比孤遣使致書唐永徽五年遣使獻琥珀馬腦長安二年遣其朝臣真人貢方物開元初遣使來朝天寶十二年又遣使來貢元和元年遣高階真人來貢開成四年又遣使來貢此與其所記皆同大中光啓龍德及周廣順中皆嘗遣僧至中國唐書中五代史失其傳唐咸亨中乃開元二十三年大曆十一年建中元年皆來朝貢其記不載太宗召見奮然存

撫之甚厚賜紫衣館于太平興國寺上聞其國王一姓
傳繼臣下皆世官因歎息謂宰相曰此島夷耳乃世祚
遐久其臣亦繼襲不絕此蓋古之道也中國自唐季之
亂寓縣分裂梁周五代享歷尤促大臣世胄鮮能嗣續
朕雖德慙往聖常夙夜寅畏講求治本不敢暇逸建無
窮之業垂可久之範亦以爲子孫之計使大臣之後世
襲祿位此朕之心焉其國多有中國典籍奮然之來復
得孝經一卷越王孝經新義第十五卷皆金縷紅羅
標水晶爲軸孝經卽鄭氏注者越王者乃唐太宗子越
王貞新義者記室參軍任希古等撰也奮然復求詣五

臺許之令所過續食又求印本大藏經詔亦給之二年
隨台州寧海縣商人鄭仁德船歸其國後數年仁德還
奮然遣其弟子喜因奉表來謝曰日本國東大寺大朝
法濟大師賜紫沙門奮然啓傷鱗入夢不忘漢主之恩
枯骨合歡猶亢魏氏之敵雖云羊僧之拙誰忍鴻需之
誠奮然誠惶誠恐頓首頓首死罪奮然附商船之離岸
期魏闕於生涯望落日而西行十萬里之波濤難盡顧
信風而東別數千里之山嶽易過妄以下根之卑適詣
中華之盛於是宣旨頻降恣許荒外之跋跡宿心克協
粗觀寓內之瓌奇况乎金闕曉後望堯雲於九禁之中

巖扁晴前拜聖燈於五臺之上就三藏而稟學巡數寺
而優游遂使蓮華迴文神筆出於北闕之北貝葉印字
佛詔傳於東海之東重蒙宣恩忽趨來跡季夏解台州
之纜孟秋達本國之郊爰逮明春初到舊邑緇素欣待
侯伯慕迎伏惟陛下惠溢四溟恩高五嶽世超黃軒之
古人直金輪之新裔然空辭鳳凰之窟更還螻蟻之封
在彼在斯只仰皇德之盛越山越海敢忘帝念之深縱
粉百年之身何報一日之惠染筆拭淚伸紙搖魂不勝
慕恩之至謹差土足弟子傳燈大法師位嘉因并大朝
剃頭受戒僧祚乾等拜表以聞稱其本國永延二年歲

次戊子二月八日實端拱元年也又別啓貢佛經納青
水函琥珀青紅白水晶紅黑木櫛子念珠各一連並納
螺鈿花形平函毛籠一納螺杯二口葛籠一納法螺二
口染皮二十枚金銀時繪筥一合納髮鬘二頭又一合
納參議正四位上藤佐理手書二卷及進奉物數一卷
表狀一卷又金銀時繪硯一筥一合納金硯一鹿毛筆
松煙墨金銅水瓶鐵刀又金銀時繪扇筥一合納檜扇
二十枚蝙蝠扇二枚螺鈿梳函一對其一納赤木梳二
百七十其一納龍骨十楸螺鈿書案一螺鈿書几一金
銀時繪平筥一合納白細布五匹鹿皮籠一納貂裘一

領螺鈿鞍轡一副銅鐵燈紅綠鞞泥障倭畫屏風一雙
石流黃七百斤咸平五年建州海賈周世昌遣風飄至
日本凡七年得還與其國人滕木吉至上皆召見之世
昌以其國人唱和詩來上詞甚雕刻膚淺無所取詢其
風俗云婦人皆被髮一衣用二三縑又陳所記州名年
號上令滕木吉以所持木弓矢挽射矢不能遠詰其故
國中不習戰鬥賜木吉時裝錢遣還景德元年其國僧
寂照等八人來朝寂照不曉華言而識文字繕寫甚妙
凡問答並以筆札詔號圓通大師賜紫方袍天聖四年
十二月明州言日本國太宰府遣人貢方物而不持本

國表詔却之其後亦未通朝貢南賈時有傳其物貨至
中國者熙寧五年有僧誠尋至台州止天台國清寺願
留州以聞詔使赴闕誠尋獻銀香爐木榼子白琉璃五
香水精紫檀琥珀所飾念珠及青色織物綾神宗以其
遠人而有戒業處之開寶寺盡賜同來僧紫方袍是後
連貢方物而來者皆僧也元豐元年使通事僧仲回來
賜號慕化懷德大師明州又言得其國太宰府牒因使
人孫忠還遣仲回等貢純二百匹水銀五千兩以孫忠
乃海商而貢禮與諸國異請自移牒報而答其物直付
仲回東歸從之乾道九年始附明州綱首以方物入貢

淳熙二年倭船火兒滕大明毆鄭作死詔械大明付其
綱首歸治以其國之法三年風泊日本舟至明州衆皆
不得食行乞至臨安府者復百餘人詔人日給錢五十
文米二升俟其國舟至日遣歸十年日本七十三人復
飄至秀州華亭縣給常平義倉錢米以振之紹熙四年
秦州及秀州華亭縣復有倭人爲風所泊而至者詔勿
取其貨出常平米振給而遣之慶元六年至平江府嘉
泰二年至定海縣詔並給錢米遣歸國

党項古析支之地漢西羌之別種後周世始強盛有
風氏費聽氏往利氏頗超氏野亂氏房當氏來禽氏
拔氏最爲強族唐貞觀至上元間內附散居西北邊元
和以後頗相率爲盜會昌初武宗置三使以統之在邠
寧延者爲一使在鹽夏長澤者爲一使在靈武麟勝者
爲一使五代亦常入貢今靈夏綏麟府環慶豐州鎮戎
天德振武軍並其族帳太祖建隆二年代州刺史折也
埋來朝也埋党項之大姓世居河右有捍邊之功故授
以方州召令入覲而遣還開寶元年直蕩族首領唃倍
等引兵入寇府州爲王師所敗詔內屬羌部十六府大
首領屈遇與十二府首領羅崖領所部誅唃倍唃倍懼
以其族歸順以屈遇爲檢校太保歸德將軍羅崖唃倍

並爲檢校司徒懷化將軍太平興國二年二月靈州部
送歲市官馬賂所過族帳物粗惡羗人恚不受知州比
部郎中張全操捕得十八人殺之沒入其兵仗羊馬戎
人遂擾上遣使齎金帛撫賜其族與之盟始定召全操
下有司鞠之決杖流登州沙門島是歲靈州通遠軍界
嚟咩族折四族吐蕃村族柰啗三家族尾落族柰家族
嚟泥族剽略官綱詔靈州安守忠通遠軍董遵誨討平
之六年府州外浪族首領來都等來貢馬七年豐州大
首領黃羅并弟乞蚌等來貢馬又銀州羗部拓跋遇來
訴本州賊役苛虐乞移居內地詔令各守族帳又

族結集扇動諸部夏州巡檢使梁迥率兵討平之雍熙
初諸族渠帥附李繼遷爲寇詔判四方館事田仁朗及
閣門使王侁等相繼領兵討擊并賜麟府銀夏豐州及
日利月利族勅書招諭之二年四月侁等於銀州北破
悉利諸族斬首二千六百餘級生擒八十人俘老小一
千四百餘口器甲一百八十六梟僞署代州刺史折羅
遇并弟埋乞獲馬牛羊三萬計五月又於開光谷西杏
子平破保寺保香族追奔二十餘里斬首八百餘級梟
其首領埋乞已等五十七人生擒四十九人俘其老小
三百餘人獲牛羊馬驢凡四千餘計又破保洗兩族俘

三千人降五十五族獲牛羊八千計侁等又言麟州及
三族砦羌人二千餘戶皆降會長折御也等六十四人
獻馬首罪願改圖自効爲國討賊遂與部下兵入濁輪
川斬賊首五十級會豪二十人李繼遷及三族砦監押
折御也皆遁去旋命內客省使郭守文自三交乘驛亟
往與王侁等同領邊事五月王侁李繼隆等又破銀州
杏子平東北山谷內沒邵浪悉訛等族及濁輪川東鬼
頭川西諸族生擒七十八人梟五十九人俘二百三十
六口牛羊驢馬千二百六十招降千四百五十二戶六
月夏州吐憲等引兵至監城吳移越移等四族來降憲

等撫之岌伽羅賦十四族拒命憲等縱兵斬首千餘級
俘擒百人焚千餘帳獲馬牛羊七千計又降銀麟夏等
州三族砦諸部一百二十五族合萬六千一百八十九
戶酋豪折御也窮感來歸守文置之部下又夏州咩鬼
族魔病人也崖在南山族結黨爲寇招懷不至擒斬之
梟首狗衆并滅其族又府州女也族首領來母崖男社
正等內附因遷居茗也族中七月賜宥州界咩兀十族
首領都指揮使遇也布等九人勅書以安撫之十一月
以鞫浪族十六府大首領屈遇名波族十二府大首領
浪買當豐州路最爲忠順及兀泥三族首領佶移等女

女四族首領殺越都等歸化並賜勅書撫之端拱元年
三月火山軍言河西羌部直蕩族內附三年四月夏州
趙保忠言臣準詔市馬已獲三百匹其宥州御泥布囉
樹等二族黨附繼遷不肯賣馬臣遂領兵掩殺二百餘
人擒百餘人其族即降各已安撫詔書獎諭之十月繼
遷寇會州熟倉族爲其首領咩唃率來離諸族擊走之
淳化元年藏才三族都判啜尾卒其子啜香來請命乃
令代其父二年七月以黃七族降戶七百餘散于銀夏
州舊地處之八月李繼遷居玉庭鎮趙保忠往襲之繼
遷奔鐵斤澤貌奴猥才二族奪其牛畜二萬餘十一月

繼遷寇熟倉族刺史咩唃率來離諸族擊退之先是尤
泥大首領泥中佶移內附詔授慎州節度俄復歸繼遷
其長子突厥羅與首領黃羅至是以千餘帳降府州折
御卿以聞降詔慰諭之趙保忠又襲破宥州御泥布羅
樹二族尋各降之以其朋附繼遷來上四年三月直蕩
族大首領啜尾子河以大首領馬一並來貢詔以啜尾
叔羅買爲本族都監又啜尾下首領十人馬一下首領
十二人皆賜錦袍銀帶器幣是年鄭文寶獻議禁青鹽
羌族四十四首領盟于楊家族引兵騎萬三千餘人人
寇環州石昌鎮知環州程德玄等擊走之因詔屯田員

外郎知制誥錢若水馳驛詣邊弛其鹽禁由是部族寧
息十二月鹽州羌人會長巢延涓爲本州刺史是年藏
才西族大首領羅妹來貢五年正月以綏州羌會蘇移
山海陵母馱香三人並爲懷化將軍野利鬼名也種
泥三人並爲歸德郎將四月府州折御卿言銀夏州管
勾生戶八千帳族悉來歸附錄其馬牛羊萬計邈二族
大首領崖羅藏才東族首領歲囉啜克各遣其子弟朝
貢六月繼遷所驅脅固屬戎人橐駝路熟藏族首領七
遇率部族反攻繼遷其弟力戰而死旣敗繼遷之衆復
來歸附以遇爲檢校司空領會州刺史是年元泥族首

領黃羅內附以爲懷化將軍領昭州刺史至道元年四
月以勒浪鬼女兒門十六府大首領馬尾等內附以馬
尾爲歸德大將軍領恩州刺史以勒浪樹李兒門首領
沒崖爲安化郎將副首領遇兀爲保順郎將六月賜慶
州界首領順州刺史李奉明澄州刺史李彥咩鹽州刺
史巢延涓濱州刺史李順忠環州界首領會州刺史也
遇及靈州界并河外保安保靖臨河懷遠定遠五鎮等
部勅書慰撫之七月曠泥族首領你七逋合男詣靈州
言族內七百餘帳爲李繼遷劫略首領咩逋一族奔往
蕭關你七逋一族乞賜救助詔賜以資糧環州熟倉族

宋史卷四百一十四 列傳 十六
乂遇略奪繼遷牛馬三十餘繼遷令人招撫之乂遇答云吾一心向漢誓死不移詔以遇爲會州刺史賜帛五十匹茶五十斤二年三月以府州界五族大首領折突厥移爲安遠大將軍父死來請命也六月勒浪族副首領遇兀等百九十三人歸附貢馬七匹遇兀舊隸契丹淳化初遷族帳於府州界東至河百五十里南至府州三百里至是始朝貢上召問慰勞賜錦袍銀帶遇兀言部族多良馬今始來朝所貢未備上曰吾嘉爾忠順之節慕化來歸同不以多馬爲意也七月李繼隆出討繼遷賜麟府州兀泥巾族大首領突厥羅女女殺族夫首

領越都女女夢勒族大首領越移女女忙族大首領越置女女雙兒族大首領党移沒兒族大首領莫末移路也族大首領越移細也族大首領慶元路才族大首領羅保細母族大首領羅保保也凡十族勅書招懷之闕七月懷安鎮羌誘諸族寇慶州監軍趙繼昇率師擊敗之斬首三百級獲羊馬千計三年二月泥巾族大首領名悉俄首領皆移尹遇崔保羅沒估凡五人來貢馬名悉俄等舊皆內屬因李繼遷之叛徙居河北今復來貢咸平元年三月熟倉族乂遇來朝真宗嘉其誠節親見撫勞賜以器幣十月兀泥族大首領昭州刺史黃羅對

于崇德殿兀泥族在青岡嶺三角城龍馬川領族帳千
五百戶初隸繼遷俄投府州淳化中數敗契丹及與繼
遷相攻擊及繼遷內附黃羅懼北徙過黃河今還舊地
遂入貢且言繼遷既受朝命不敢侵伐上面加獎慰賜
賚甚厚十二月詔直蕩族大首領鬼啜尾于金家堡置
渡令諸族互市二年正月以咩逋族開道使泥埋領費
州刺史十月以勒浪族十六府大首領歸德大將軍恩
州刺史馬泥領本州團練使十一月藏才八族六首領
皆賞羅等來獻名馬四年七月以會州刺史能遇爲保
順郎將蘇家族屈尾鼻家族都慶白馬族埋香韋移

都香爲安化郎將九月環州言繼遷所掠羌族崑逋等
徙帳來歸又繼遷諸羌族明葉示及撲咩訛猪等首領
率屬內附並令給善地處之其年旱寧族首領喝鄰半
祝貢名馬自稱有精騎三萬願備驅策有詔慰獎厚償
其直五年咩逋族開道使費州刺史泥埋遣子城逋入
貢上嘉泥埋數與繼遷戰鬥有勞授錦州團練使以其
族弟屈子爲懷化將軍充本族指揮使城逋爲歸德將
軍充本族都巡檢使餘首領署軍主以下名識者凡十
數人又以黑山北莊郎族龍移爲安遠大將軍昧克爲
懷化將軍八月河西教練使李榮等向化其年羌寇抄

全明縣李繼周擊走之十月詔河西戎人歸投者遷內地給以閑田時勒厥麻等三族千五百帳以濁輪砦失守越河內屬分處邊境邊臣屢言勒厥麻往來賊中恐復叛去乃徙置憲州樓煩縣遣使賜金帛撫慰十二月咩邁族遣使來貢上聞賀蘭山有小涼大涼族甚盛常恣與繼遷合勢為患近知互有疑隙輒相攻掠朝廷欲遂撫之乃召問咩邁使者因其還特詔賜之以激其立効上又謂樞密使王繼英等曰邊臣言遷賊舉兵屢為龍移昧克所敗此族在黃河北數萬帳或號莊郎昧克常以馬附藏才入貢頗勤外禦六年遂降詔獎慰之二

月葉市族囉埋等持繼遷偽署牒率百餘帳來歸以囉埋為本族指揮使囉胡為軍使邠寧部署言牛羊蘇家等族殺繼遷族帳有功上曰此族特遠與僉久為賊援屢遣邊吏招諭近聞有志內附尚疑其詐果能格鬪立効詔厚賜首領等茶絲以獎激之涇原部署言者龍移卑陵山首領斯敦毳遣使稱已集本族騎兵願隨軍討賊二月以咩邁族首領泥埋領鄯州防禦使充靈州河外五鎮都巡檢使時潘羅支已授河西節制上以泥埋實與羅支犄角捍賊故加恩寵是月綏州羌部軍使拽白等百九十五口內屬原州熟戶裴天下等請率族兵

掩擊遷黨移湖等帳來求策應部署司不報上以戎人
宣力禦賊不應沮之即詔諭諸路以精甲策應環州會
長蘇尚娘擊賊有勞及屢告賊中機事以爲臨州刺史
賜錦袍銀帶環慶部署張凝言內屬戎人與賊界錯居
屢爲脅誘臣領兵離木波鎮直湊八州原下峇招降岑
移等三十二族又至分水嶺降麻謀等二十一族柔遠
鎮降巢迷等二十族遂抵業樂降移樹羅家等一百族
合四千八十戶第給袍帶物絲慰遣還帳四月繼遷寇
洪德砦酋長慶香與訛移慶族合勢擊之以砦兵策援
大敗繼遷擒四十九人墜崖死者甚衆獲馬七十餘匹

旗鼓鎧甲數百計上考陞圖以問入奏使使者言砦兵
拒賊千餘步慶香等親率部族與賊接戰上曰慶香等
假王師爲援而交鋒俘獲乃其功也悉與所獲物加賜
銀綵以慶香領順州刺史訛移慶領羅州刺史河西內
屬折勒厥麻等三族請以精兵千人馬三百備征討詔
嵐州撫諭環州白馬族與繼遷戰闕屢徙帳乏食賜廩
粟又詔洪德砦歸附戎人給內地土田資以口糧五月
唐龍鎮上言鎮有貿易于府州者爲州人邀殺盡奪資
畜乃詔府州自今許互市切加存撫六月瓦窰沒刺
如羅昧克等族濟河擊敗繼遷黨優詔撫問七月補狸

野族首領子阿宜爲懷安將軍八月原渭等州言本界
戎人來附者八部二十五族今詣吏納質以環州蘇尚
娘子孽娘爲臨州刺史府州八族都校明義等言屢于
麟州屈野川擊繼遷及緣邊六七柵防遏皆有克獲詔
獎賚之仍令府州常以勁兵援助勿失機便景德元年
正月麟府路言附契丹戎人言泥族拔黃太尉率三百
餘帳內屬拔黃本大族居黃河北古豐州前數犯邊阻
市馬之路其首領容貌甚偉有智勇桀黠難制契丹結
之署爲太尉今悉衆款塞詔府州厚賜茶糶給公田依
險居之計口賦粟且戒唐龍鎮無得侵擾三月宋師恭

破羌賊於柳谷川驅其帳族千餘人以還六月洪德砦
言羌俗羅泥天王等首領率屬來附八月野雞族侵掠
環慶界詔邊臣和斷如其不從則脅以兵威九月鎮戎
軍言先叛去熟魏族會長茄羅兀賊成王等三族應詔
撫諭各率屬來歸二年熟戶旺家族擊夏兵擒軍主一
人以獻環州言戎人入寇擊走之擒酋將慶懿送闕下
請斬于藁街上特賈死配淮南原州野狸族首領廝多
逋丹卒其子阿酌代爲首領且乞奉料詔諭以立功則
賜之三年府州折惟昌言兀泥族大首領名崖從父盛
信爲趙德明白池軍工密遣使諭名崖云德明雖外託

脩貢之名而點閱兵馬尤急必恐劫掠山界名崖以告
上嘉之降詔撫諭就賜錦袍銀帶九月秦州言野兒和
尚族部落尤大能稟朝命凡諸族爲寇盜者輒遏絕之
請加旌別詔補三砦都首領十一月鎮戎軍曹瑋言叛
去酋長蘇尚娘復求歸附詔報瑋曰尚娘反覆無信特
恐狙詐以誤邊吏又使德明緣此爲詞不可納也四年
唐龍鎮羌族來美與其叔璘不叶召契丹破之來依府
州璘美非大族常持兩端頃亦寇鈔近界發兵趣之則
走河之東曰東澤契丹加兵則入河之西曰西澤地極
險阻介卒騎兵所不能及至是上亦憫其窮而款塞特

復容之會契丹使至卽合諭其事切還所掠璘美人畜
其族人懷正又與璘互相讐劫側近帳族不寧詔遣使
召而盟之依本俗法和斷大中祥符元年鄜延鈐轄言
小湖臥浪族軍主最處近塞往時出師皆命爲前鋒甚
著誠節詔補 崇二年六月麟府鈐轄言杜慶族依援
唐龍鎮數侵別帳請發熟戶兵擊之上曰戎落皆吾民
也宜以道撫之不許其年兀泥族大首領名崖同府州
折惟昌入貢上親加撫問特詔副都知張繼自 賜射於
瓊林苑四年藏才西族中族首領奴移橫全集 止遣子
來朝五年環慶熟戶有酗酒劫奪使臣馬纓者上怒令

宋史卷一百一十五
五
部署司重罰之六年北界剋山軍主率衆過大里河侵
熟戶爲羅勒族都囉擊走之詔以都囉爲本族指揮使
且諭邊臣約飭族帳謹守疆界勿出境追襲九月夏州
略去熟戶旺家族首領都子等來歸隨而至者又三族
遣使存勞之七年涇原鈐轄曹瑋請署熟戶百帳以
大首領爲大族軍主次指揮使又次副指揮使百帳而
下爲本族指揮使從之五月瑋言葉市族大首領艷奴
歸順七月瑋又言北界萬子族謀鈔略發兵逆之大敗
于天麻川又爲魏埋等族掩擊殺其酋斬首千餘級
八年北界會長指揮使浪梅娘等來投諭邊臣令追取

熟戶亡人北界者卽遣還梅娘九年羌兵寇小力族巡
檢李文貞率兵奮擊追斬藉遇大保首級賜文貞錦袍
銀帶五月北界毛尸族軍主浪埋骨咩族會長訖唱巢
迷族會長馮移埋率其屬千一百九十口牛馬雜畜千
八百歸附降詔撫之天禧元年環州言北界騎兵數千
來剽熟戶擊走之二年涇原路言樊家族九門都首領
客廝鐸內屬以廝鐸爲軍主三年廊延路言亡去熟戶
委乞等六百九十五人及骨咩大門等族來歸四年正
月又言宥州羌族臘兒率衆劫熟戶咩魏族金明都監
李士彬擊之斬臘兒梟七十二級俘餘衆獲甲馬三百

餘五月小湖族都虞候啗崑巡檢胡懷節等擊賊有功
並遣秩環州七曰族軍主近贓納質歸化以近贓領順
州刺史首領惹都等十五人補官有差七月撲咥族馬
訛等率屬來附十月以淮安鎮六族都軍主乞埋爲三
班借職充羌部巡檢五年北界羅骨等劫剽熟戶環慶
部署田敏追擊之俘獲甚衆詔獎敏等賜賜幣

